



自在村人藏

攸縣志 五



儒林

元

馮子振 有全傳見藝文崇祀鄉賢

譚淵字古山少從荆溪吳公子良遊習聞理要公車
交辟有聲於時晚戢影田園建鳳山書院於里中
一時彬彬稱盛

易爰正延祐中進士廷試第二十五名授寧鄉縣丞
居官三年有善政尤邃於經學四方英才多受業
於其門崇祀鄉賢

張公大至治中進士廷試第三名同郡歐陽元功見

其詞章典贍推爲後進領袖

文源逢四次鄉舉乃成進士博學多聞與雲陽劉朝端齊名

明

李子春學問該洽與同邑何楚英齊名永樂戊子科冠楚闈何亦同雋後何以名宦著李以經學名

劉魯初字厚菴元進士劉漢中之元孫由舉人任南直長洲司訓旋擢州牧不就歸里後居邑之三台洲潛心洛閩之書兼工韻語著有晚香園集

陳鏞宏治時由歲貢生朝考列第一質敏嗜學耿介之操著名一時崇祀鄉賢

陳惟順字南崖任北京光祿寺大官署丞夙受學湛甘泉曾偕至粵中一載甘泉作壯哉行以嘉其志與雲陽張龍湖友善互相討論所著有尙書問崇正新語天關居學錄至捐置義倉鼎新文廟修西關大江浮橋皆重務不吝多金崇祀鄉賢

陳克恭名欽泰以字行歲貢與雲陽劉學士三吾爲文字交學有師承築別業於邑之界江顏曰容與軒貯經籍其中竭力教授同邑進士王以德其高第弟子之一也所著有容與軒吟劉學士序之曰

此音當在大歷才子之間

易舒誥有全傳見藝文崇祀鄉賢

羅星號二峯正德丙子科第是聞自謂學尙未淹通
不赴公車益下帷攻苦尤邃於易同邑孝廉劉欽
薦選貢陳惟健皆從之學易家貧不干有司以教
授爲業時寶慶四科無中式者郡守禮聘之令能
文之士執經請業是科捷者三人後被賊傷右臂
習左手書不官而卒

彭澤字民望與羅解元同榜官南直應天府通判茶
陵李文正公雅重其文名在都下先後唱和詩近

二百首李文正序而行之自著有老葵集

陳論字思魯師事湛甘泉先生潛心理學具有心得
提學陳鳳梧聘爲嶽麓山長郡守孫存聘修長沙
府志郡守李日章舉爲鄉飲大賓學成行尊楚中
人士咸景慕之事節母王氏克敦孝道終母喪追
服父喪三年所著有忠節補遺日勤九省錄嶽麓
書院志御史朱篋移檄崇祀鄉賢

王嘉美字紹平選貢生環堵蕭然琴書不輟授徒山
中凡問業者曲盡誨誘一時秀士多出其門安成
鄒東廓先生稱爲河汾嗣音

陳惟健號特峯選貢生髫齡時易西泉太史試以聯
云紅爐添獸炭答曰綵筆寫鸞箋西泉竒之妻以
女甫冠食餼邑人羅星以易經掄元迎而師事之
遂精易理後授四川順慶府訓導未之任卒

陳懷號水簾諸生工古文詩賦後遊太學聲譽日隆
一時名公如侍郎何吉陽少卿江冕督學劉宗道
皆賓禮之負經濟才留心邊防及山川形勢兵制
屯政著有廣輿道聽日記

蔡承仲邑廩生美丰標下筆鴻文無範詩賦具潘陸
之藻屢冠諸生七試棘闈賫志而卒

陳彛字子六廩生耿介好學戶外問字屢滿歲收筆
耕貲供母膳撫兩弟一侄親愛尤篤庭外蓬蒿沒
徑簡交自潔卽范釜多塵恬如也崇祀鄉賢

陳時可字四如副貢生力學窮經英雋多從受業以
館穀養親事繼母如母族有嫁娶不給者分束修
助之邑有庭闈不協者明大倫正之兩舉德行大
賓崇祀鄉賢子六禮諸生崇祀鄉賢六竒六樂俱
廩生孫之駉府貢生爲國朝名士餘多著聲仕籍
劉三英字豈庸舉人少孤事繼祖母羅繼母譚以孝
稱杜門著述下筆古奧惜墨如金與族兄捷齊名

時號二劉性耿介尚氣節業師永新劉叔豹卒於
攸爲經紀其喪附葬劉氏先塋教授生徒邑知名
士多出其門著有龍橋文集門人蔡來蘇作龍橋
先生傳子名勛孫傳杲俱有聲黌序

文應揚字含仲舉人雲南布政士昂子丁明季寇亂
隱居晦跡 國朝順治十二年聘爲白鹿書院山
長闡明經學門下士得所師承其後列仕版者多
以循卓著聲生平勤學敦行倡修本邑學宮振興
儒雅士林仰之著有昭江草詩集

陳五鼎字耳臣由選貢中副榜與同邑劉杜三並擅
才名崇正末無錫堵公題爲耒陽司訓旋解組居
邑之界江杜門著述有兩餘堂詩文集

劉伯震號六一諸生慷慨有氣節邑貴介爲羣小侮
及同學遭困辱者震每以身翼之爲名教干城

易紹昌字文孫家貧績學胸羅經傳手所丹黃極有
闡發以諸生終

胡爾熙字嶽引諸生讀書以敦本爲先而氣槩倜儻
有某官素酷烈嘗以嫌殺其侍妾委於道莫敢收
熙曰安有人而狐狸葬者卽有咎我當受備棺斂
葬之某尋悔且陰感焉有姻好以曖昧事罹於法

熙爲代白其枉其人懷五十金致謝笑而却之曰
吾寧以直沽金哉著有易學引蒙

陳五聚字史占年十九中副車仕爲監軍旋以獨子
歸養築茅亭別室貯經史其中丁明季寇擾與冥
鴻之士聚而講學流風甚遠

皇清

劉捷字月三廩生少孤奉孀母陳氏孝養不渝母嘗
勉之曰青紫非他物當於汝斑衣中見之自是折
節好學經史歲必數過堅苦刻勵至罷眠食試草
一出人爭傳寫嘗僑居金陵與張天如華鵝湖講

明經學互相討論後歸讀書食野園聞風者多就
而請業年八十猶篝燈夜讀課孫曾無虛日每念
母訓深以弗獲顯揚爲恨今其後嗣多以文章科
名顯所著有食野園文集金陵懷萱詩


王師臣字卜可廩生文行兼優善誘後進督學陽羨
蔣公以德行可師獎之輪貢而卒

蔡祖斑字文中由進士授中書旋歸里杜門研經砥
礪德行有司未嘗識其面清風亮節爲一時楷模
譚名世號叔闇由選貢任興寧教諭轉山東卽墨縣
丞三舉鄉飲大賓規言矩行鄉邦推爲典型

單士達字羽臣歲貢生與同邑陳桃文先生並受知於督學陽羨蔣公慎齋是時長沙十二城有陳單兩秀才之目蔣公每稱羽臣而疑於所姓之音曰此姓無丹江南有善耳桃文應以譜系姓亦有丹公領之羽臣以文章傾倒宗匠其蒙眊昧蓋不虛蔡合天字冲自由歲貢官宜都教諭淹貫經史博聞強記以理學著名佳士多出其門入京都名公鉅卿咸待以國士贈詩盈篋著有劍首一映詩集怡

文堂文集

劉楚英字以燦廩生學尚博綜不株守一家言素性



原件短缺

別業吟玩其中著有月麓堂集十卷一時名宿如

金會公胡抑齋沈存田諸太史皆有楚南名家

目之

劉起光字質先諸生負雋才博學工文喜吟咏嘗避

亂父爲賊所獲索贖金不得將加害光請以身代

賊義而兩釋之平居事兄恭順無間著有堅白

堂集

陳之駿字五之生而穎異未弱冠名噪黌序於經世

大端務究極根柢思爲當時用順治戊戌中丞袁

進取武靖與閣部洪會師沅州時雲南驛糧道趙

薦駿叅軍務以支放錢糧有功題授縣令未就亡

酉中丞廬復延入幕在署五載贊當事奏免捏報

墾荒包賠荒糧等事昭雪湘陰熊某株連無辜二百五十二名丁巳中丞韓復聘隨征軍中以縣令銜錄用己未長郡底定駿請寬脅從嚴擄掠又贓當事奏免三十二州縣及各衛所新荒逃亾等事癸亥歸里捐五百金葺宗祠生平多隱德不苟取與廣濟金會元德嘉誌其墓崇祀鄉賢

劉詢字小岳博學強記工詩文髫年食餼鍵戶不入公門順治庚子主司奇其文擬元不果遂不復應試著有制藝及自怡齋詩集

劉旦升字友望增生孝友端方閉戶訓子鉅恩貢錫歲貢鐸教諭鉉縣丞時有燕山之目撫孤侄婚教如子葺宗祠修學宮啟聖祠捐金不吝著有遇覽卽筆家訓

陳之駉 有全傳見藝文

劉士英字三粲增生工制藝善書翰康熙乙酉房考得其卷擬冠一經以額溢見遺下帷益奮生平砥礪行誼不染塵氛有歷試草行世

蔡來蘓字眉人歲貢生自少嗜古如居奇田園寢落籤函日富家置萬卷樓寢饋其中所爲詩文以性靈運該洽曲達理致不詭於正素尚義烈不畏強

禦朋友有事皆得援爲緩急理有所激雖宰官無
屈凡邑中建舉不憚煩勞其在邢州爲通守許公
所致又應當塗令藍次公幕陰多庇益令不失名
已不望報蓋文而俠者著有環山集詩古文子上
寬廩生工詩有避喧集

陳標字錦臣行端學博與弟梧有二陳之目下筆灑
落自喜以明經司訓會同好學如總角時長吏重
之學中有爭獄請鞠謝曰清靜地不願爲訟庭也
著有玉硯堂文集梅花百詠詩

劉登庸 有全傳見藝文

虞榮廩生鍵戶稽誼自成一家督學姚中丞下深器
之著有魯遊草玉峯集

劉士夔字伯讓舉人議論恢奇而繩檢自飭有過必
自省廣開別墅曰此間有三不倦友架上帙欄畔
花及青州從事而已

龍起洛字天書諸生幼孤事諸兄甚謹屬文古澁有
別趣晚益卷跡塵氛自全其天云

夏芬字馥遠副貢生弱冠教授卽能說經鏗鏘學子
有貧而才美者分脯修資之以成其才尤邃於尙書
尹景莘字耕備歲貢任常寧訓導殫心經學戶外屨

滿耿介端方士林重之年九十三子予舉人

洪特書字塊觀恩貢生文有奇氣儁傑廉悍觀者舌
橋嘗刻燭爲文一揮七藝藝林傳爲佳話同里陳
桃文博雅噪湖湘亦以畏友推之

洪素書字石授廩生世居城東先世迭以文章節義
顯素與諸從昆弟並承家學文章經術分道揚鑣
邑中談藝輒僂指東門洪氏素學深養恬至於重
然諾尙氣誼朋友緩急應之不稍後猶是先世豁
達餘風子二開湘廩生開豐歲貢生

劉傳松 有全傳見藝文

余嶠齡字亞倩廩貢生弱冠食餼受知於邱學使爲
文醇茂九試屢薦鍵戶潛修有司咸高其品八歲
失母事父肫篤友愛異母弟人無間言尤敦善行
修宗祠置義田造橋梁子潮進士澤歲貢自課二
孫髫年入泮中丞蔣表其墓

洪如伋字鳳干諸生授徒講貫務竭其誠領其旨者
足以開拓心胸增長智識著有媚獨齋集

蔡儼字望若由舉人授中書旋歸里持身簡約居城
市蕭然如林泉日以經籍自娛尤篤於友誼有古
君子遺風

蔡儷字樸巖諸生少孤依其祖祖卒朝夕奠如存歲
以爲常世業頗豐不喜治生產自立錄過格可稱
質行儒者

劉誠字又存增生家貧績學博覽強記下筆富於萬
言事節母譚撫幼弟郡庠生諱孝友克敦年十九
縣府院試俱冠軍其後文譽日隆教授著聲負笈
者至不能容康熙丙午桃源令汪鳳麓奇其文呈
薦擬元旋延爲西賓著有桃源詩賦草蕉陰詩集
江西進士蕭致良邑令陳南陔爲之序

陳治長字久菴諸生常調衆人役役聖人兢兢老氏
任自然耳生平葆真抱素坐擁書城不粉飾媚世
易簣時自題銘旌曰古無懷氏今鈍秀才子兆崧
副貢兆眉歲貢孫其剋歲貢

陳兆壘字應湘增生介而和人有善津津樂道如弗
及己有過不厭人指摘同學咸畏敬之著有梅軒
陳治熇字彤如廩生七試鄉闈康熙乙酉戊子兩薦
不售益績學不倦課二弟若巖師婦翁蔡非致年
逾五十無子焯出貲爲納妾得生一子並撫奇俾
之成立人稱其義

劉其瀾字波雲廩生通經史文如湧泉幼與兄其渤

同受知督學蔣公有大宋小宋之譽中丞丁目為

國士康熙丙子擬元見遺著有南樓稿五經講義

劉來垣字師維恩貢生入泮時七藝立就撥入湘陰

學淹洽經史至老研討綦勤著有詩文行世名公

卿咸賓禮之湘陰致仕江蘓常鎮道王之錡為之立傳

劉光軾字鸞昭增生幼慧能文長淹貫羣書與仲兒

鎬齊名父文學枚升好客軾以筆耕供之曾拾遺

金於道候其人還之有隣子夜伏其室獲之曰饑

寒迫汝耶給薪米歸之其人卒改行

劉光鎬字汝達廩生少從父避亂半山遂家焉躬耕

養親糲松脂讀書常達旦不休借人藏本過目成

誦有蠹損處意會之無差兄弟同爨至老以詩文

相娛屢受知宗匠著有東山試草四書講義

洪圖成字寧人貢生負才不羈邑有大事侃侃抗論

無不切中要害中湘陳滄洲先生深器之晚家居

課子手抄秦漢唐宋文數十卷著有一柳堂詩集

洪圖南字掠潮諸生友愛弟舅化導羣從世業公掌

者聽諸姪取携夙慷慨尚義朋友有急若痾瘵在

己著有二柳堂詩集

蔡來宣字方于恩貢生殫心理學屢試冠軍廣授生

徒邑侯吳聞其賢延爲西賓有君子人之目生平
孝親信友撫孤睦族辨義利篤躬行學者頌之子
上灝明經

劉應洵字眉山廩生篤學力行繼母老而病癱洵躬
進飲食滌裳衣五年如一日念兄嗜飲業落終身
共爨無私幼受業於增生劉世祚及祚年邁迎養
於家屢倡義舉邑人欽慕晚闢十松精廬裁成甚

劉應壽字仁山優廩生幼孤母蔡氏教習成名母卒
廬墓三年有羣鳥翔集之異篤於一本族人率教
還薄者亦化爲敦厚每邑令下車輒詢訪之不干

以私博極羣書風工文詞學者稱松亭先生

何祖生字振宗諸生世家邑東溫水距江右安城不
遠常負笈從豫章名宿講學於麟經尤探其奧制
藝精工不利舉場著有善言脩要典故通考

張光甲字捷登雍正丙午亞元與兄光國同榜闈墨
流傳饒有 國初諸老遺韻丁未禮闈中明通榜
例得授教職銓部以青年期其遠到遂停選歸里
益肆力於學旋以疾卒負才而不永年士林惜之
著有清溪文集

陳履謙字訥菴諸生自稱天放山人家世傳古學父

史占隱居不仕謙日侍庭闈稽經誨史浸淫漢魏
性高曠常語同學曰願天下無饑寒人願天下無
夭折人願天下無毒心人履道坦坦人不敢干以
私有質疑則娓娓不倦片善務筆之於書每誡子
弟勿忘祖訓所著有古文詩賦全集唐詩人考尙
論品次旅遊草惜陰閣論文

劉光鈺 有全傳見藝文

陳鴻賓字燕閑號天池事節母劉克孝弱冠遊庠屢
爲督學賞拔兩赴湖廣鄉闈緣重湖涉險恐貽母
憂遂不復應秋賦顛顛以敦本行爲務王持族政

數十年纂譜建祠率子姓講學明禮蔚然振興著
有天池文集子五長述遠早卒述遵述基述祥述
常後先列鬢序有文名

吳宏濬字奠安諸生封文林郎少篤學銳志科名子
先舉登賢書濬猶應秋賦生平規言矩行里黨矜
式行年九十矍鑠不衰就養粵東官署歲餘卽歸
仍日課孫曾不懈壽九十五子六長先舉官廣東
定安知縣餘俱有聲庠序

廖夢熊字勳周號涓川增生天才英挺詩古文皆別
具風神制藝亦擺落一切吳荆山先生祀嶽來衡

見而擊節不置爲叙其文藁云熊熊之光上燭牛
斗學老材鉅不久伏櫪衡山聶環溪進士尤推重
之惜年未四十卒後環溪自泚江經攸嘗維舟過
其故宅意在訪求遺稿應門無人歎息而返

胡一翥字又起諸生制藝爲楚南名家奄有前代王
唐徐羅遺韵晚自訂真稿百餘篇其自叙曰始求
之杳渺縱橫旣求之幽深峭刻又求之幽潔夫而
後以清真爲主今其文具在可覆按也生平於經
學通賈鄭於史學嗜班范而制藝用功尤深其伉
壯橫恣者自名充稿其矯變虛警者自名貼稿而

刊落一切排粗入細則真稿也素性孤高不爲名
利動晚歲閉門戢影益無知者提學山陽阮裴園
先生按試長郡行文名翥時翥已不應試阮蓋因
中湘胡太史宗孟以知翥翥乃一就試翩然而反
其自命盖可想見邑進士王念亭贈詩云陶令無
言空解意仲宣能賦自登樓燕珉在市皆重襲荆
玉陳庭只閣投寂寞江山搖落盡踈狂身世梗蓬
流十年老眼渾無淚洒向君前不自由感喟良深
龍璠字魯璵由副貢登賢書幼篤學體認先儒有心
得痛父象乾以諸生早沒益刻勵爲真儒名振湘

南門下稱盛邑明經劉南村太史陳春江皆其高
第弟子品醇養邃卓然典型年屆八旬課孫曾不
懈學博再贈以詩有八十薪傳口授經之句太守
呂公贈額有品端行方之目沒後春江太史輓聯
云十年請事先生語此後臨深小子知其風範可
髣髴云子思騰思翰思颺思見

余澣字鯤門副貢生殫心經學言動有法雖燕居衣
冠必飭世居南城因二親安居北鄉廬墓絲塘峽
建五雲閣以居著有讀中庸一卷邑令蔣春巖序
行之麓泉詩集文集李寶幢學使沈毅菴明府序

之子世本拔貢

劉傳相字元受歲貢授桂東訓導性純孝事父洪珠
母陳氏竭力承歡母年踰七旬親侍湯藥每夕稽
顙額天願以身代夜夢神示醫方和藥進之病遂
愈訓同懷弟及子姪成名列仕籍者五人數十年
一門式好無間相畧無私積每得薄俸輒資義舉
修黃辛村橋設郭外義渡全貧民王友仁之配施
棺施藥終身行之不倦在官時年已八十餘每與
諸生講讀律令至孝順父母條輒潛然不自勝及
卒桂人士醵金資喪無少長皆白衣冠送之

彭廷梅字湘南任河南河內縣丞有能聲工詩入京
客 慎郡王邸命選 國朝詩名達江左袁子才
太史與訂交金陵隨園詩話曾採其詩入之梅得
詩法於中湘陳滄洲先生著有擊空吟詩集

余澤宇施久十齡入泮後以明經任鄆邑訓導課士
有方所輯有四書講義及恕齋試草年八旬解組
修族譜捐祭田本行爲尤篤云子世棟諸生世桐
貢生

劉傳敷字如向號麟源與亢京士學生力學工文弱
冠補諸生雍正己酉舉於鄉授桃源教諭蒞任倡

修學宮月課嚴明諸生翕然宗之年六十卒於官
署

龍思騰字臺巖兩中副榜任東安教諭陞永順府教
授重修兩處學宮訓士以端品爲先諸生通脫者
莫不以嚴見憚可稱人師子榮監生

鄧祖授字傳中由選貢鄉舉中明通歷任桃源沅陵
教諭澧州學正所至研經講學裁成尤多著有澧
陽新咏

陳建乾歲貢讀書務心得意所不安卽儒先傳注必
再四紬繹文筆矜貴吉光片羽學者爭寶貴之于

斯振孫煥文麗中煦文俱諸生

歐陽光選號青圃少穎悟祖一正司鐸宜章攜選在署親授經傳文名遂播郴桂間知名士咸推許之後登乾隆壬申賢書由福建鹽大使改補教諭銓選仍得宜章清操不愧乃祖云

歐陽鼎象字天瑞父定虔庭訓綦嚴象承其教有文名以明經任巴陵訓導愛士如子弟所保護者不少壽七十八子命綬職員孫穀諸生

劉林青字經雪別號南村廩貢生研治經史於毛氏古本點勘綦勤九變復貫茶陵彭大司馬稱其腹有積書署其樓曰宜稼所著有經疑洪範傳卦變詰貞悔詰藏於宜稼樓邑中學者稱爲南村先生陳夢元字體齋壯歲入詞垣先後居京師十餘載不干仕進顓顓勤學好問與諸城竇東舉大興朱竹君桐城姚姬傳昌平陳伯思休寧戴東原侯官林香海切磋討論得文章正傳香海贈詩云衆星爭夜景孤月皓秋旻並世誰同調先生迴絕倫非虛

語也生平辨義利嚴廉耻於戴東原贈行序言可
得其槩所著闇齋初編杓稿雙江別稿先已刊行
晚自訂春江古文四卷春江詩集春江制藝藏於
存醇樓

陳葵字向父諸生介性亮節條然拔俗家無儋石恬
如也淵源家學古詩學選學太自古賦雜文出入
兩司馬揚班之間湘潭陳學田觀察會梓其蘭洲
雜編於浙西又著有如如經解全傳見藝文

劉大文字雅人號炳也成童補弟子員棘闈七試兩
薦任祁陽司訓振興士習躬行以勵諸生督學盧
有文行兼優之獎會刊其制藝入試牘祁士咸欽
其行誼後解組歸里杜門不妄結納以經訓自娛
一時有人師之日子華枝早卒瓊諸生

鄧世謙號退齋髫齡工詩長肆力古學錢塘倪宗師
按試長郡古學援筆立成十藝與中湘張度西並
擅才名後以明經司訓鄱邑戒華虛崇實學士習
丕振著有詩集藏於家

劉介輝字照青號石岑未冠食餼文名藉甚由選貢
肄業成均大司成孫公課六堂士驚爲文筆鳴鳳
後歷任辰谿新寧學博歸里掌教湘南書院經其

指授者皆有法度可觀所刊湘南書院制藝紙貴
一時自著有四書文稿長洲沈歸愚宗伯爲之序
胡一鳳字丹山號樸園副貢生官桑植學博生平孝
友肫誠耄猶孺慕於同氣無間言好學不輟與兄
廩生一麟監生一鶴互相切劘經學貫穿八旬餘
猶鏗鏗說經爲文宗法先民兼治古文詞教授諸
生一如家塾督課其學以體認聖賢鞭辟近裏着
已之功爲要門人孝廉陳玠鄭思賢稱爲道學先
生子祖邁庠生祖景監生孫自銓庠生自洙監生
文承寵號象屏自少端慤渾厚經訓之外無他嗜好

乾隆癸酉五經獲雋司鐸衡山以植品勵士躬行
化導士皆翕然仰之後陞辰州府教授值辰苗跳
梁陳捍禦策撫軍納之畧見經濟一斑生平不撓
事物人有機心者對之亦無所施可云行無瑕尤
子自奎舉人秀松歲貢

賀瓊珠字良才歲貢生髫時過目成誦讀易甫竟卽
於互體卦變研究入微師愕然曰非吾所及也制
藝於有明先正能擷其菁華出以俊偉鄉試呈薦
者再生平篤於本行母疾親滌械窻及歿喪塋盡
禮扶櫬匍行積雪中觀者感歎他如建宗祠置祭

田周卹貧困無吝色族黨咸欽晚專力訓課家塾諸子並擅才華爲名諸生著有周易解三樂堂稿陳其淑字鳴鶴一字泰初蘭洲先生季子淵源家學著述甚富爲淇園世帙之殿性伉直由舉人任道州學正旋拂衣歸掌教本邑黃甲書院武岡州書院壽八十餘所著有春秋撮要子宏人諸生

歐陽命權字吳九增生封文林郎少負文名清江楊中丞會刊其兩藝入觀風錄長益敦崇實學以行已爲要每念勿失怙恃忌日必盡哀賴太母周氏撫育教誨存沒盡禮事長兄如父奉養仲兄至老無忤性方嚴家庭肅穆人有過面規不少假見者無不歛容邑令成重其品委掌書院事邑令張委督修震陽樓權秉公經畫衆論翕然有典型之目壽七十子立煖舉人立燿歲貢孫金瑀增生金璉舉人金理廩生餘俱能文

黃鳴世字聞溪舉人性恬養邃文如其人對之者機心自息晚任邵陽教諭數載諄諄以黜華崇實爲士子訓邵人推爲有本之學子三理諸生

彭世景字砥湘恩貢學主植品於朱子虛心涵泳切已體察兩條終身服膺立教先行後文諄諄以華

虛爲戒仿前賢義倉貯穀周宗黨名曰廣愛設家塾聚族子姪肄業著學規數則世居攸北距縣治百里邑令羅聞而賢之造廬訪焉景致謝而已卒無私干學者稱嚮山先生

易秉德號蛟門與同邑周之德並擅文譽時稱二德邑令田延星沙余存吾先生在幕目爲文壇勍敵每月官課書院兩人互爲首選周才敏而氣清易學邃而思沉壬午乙酉相繼舉於鄉易連上春官卒於京子起彪起鵬俱廩生

蔡以照原名貽詒字丹錫增生幼承父彥庭訓工制

藝應鄉試二十三科乾隆庚子房考零陵令黃公

九敘力薦見遺生平好學不倦以經學教授鄉里

門下士貢成均登賢書

者接踵壽七十五學博何綸吉爲立傳子培華歲貢

余世本號立齋拔貢父麓泉爲宋儒之學於洛閩遺書研究融釋本承庭訓兼師事同里劉南村博通經傳蔚然成章書法得剛健含婀娜之妙王梅岑觀察極推重之生平篤於倫理手繪父母真容出告反面終身如事生題所居曰事守山房學者又稱五雲先生五雲閣者父麓泉建也歷掌玉潭三江玉溪書院著四書廣義詩經音訓詩集文集子

五叙敦廩生

文自炳字虎章恩貢讀書主析理不喜摭拾馳騁參透四子精義每與生徒說經口講指畫色動神飛聽者豁然制藝精瑩皆以析理出之不類臨文索理繼其師易蛟門先生教授城東介菴垂三十年裁成極盛晚因父定國年近期頤闢東洲書塾於家定省加謹生平言動不苟立教以植品爲先賢講學規範猶存有東洲文稿春秋心解行世子舒璣舒理俱舉人舒瑄舒璪俱諸生

陳圭字元達號蘭莊少學詩法於同里王念亭先生

辦香盛唐不失雅音兼工駢體書法得海岳之真褚筠心姚雪門兩學使試長郡古學登膺甄拔目爲詞壇巨手名滿湖湘數十年前後撫楚如陸明夫姜杜薌兩大中丞及韓桂齡廉使咸賓禮之掌教岳陽瀉寧雲陽及本邑震陽各書院汲引後進殘膏賸馥沾被不少晚歲以明經司鐸永明臨湘沅州不愧人師壽七十五著秋水山房詩集刊行文自軒宇半霞以廩貢歷司道州郴州綏寧桂東鐸訓課諸生以敦品爲先而文次之事親先意承志奉繼母如所生友愛異母諸弟人無間言子五舒

學職員舒培廩生孫世鈺世俊均廩生

劉大章字濤源性英敏偉儀容以廩貢肄業成均考滿授學博屢薦南北闈父歿廬墓哀毀盡禮歷秉鐸岳州府道州永順巴陵邵陽宜章諸處補綏寧司訓兼掌虎谿書院八年士類振興歸里十餘載以詩文自娛後進咸矜式之著有清署吟詩集壽八十三卒子三漱之諸生杏枝貢生壯之諸生

續增攸縣志卷三十九

權知攸縣事溧陽潘礪襄纂修

儒林

洪吉字藹人號翹岡由副榜中式舉人試禮闈屢薦未售所學力追古人不落時谿植品端方與有司相接絕口不言公事掌教本邑震陽梅城東山諸書院琢磨砥礪士習文風丕振一時列拔萃登賢書成進士膺館選者盡出其門至今學者猶思其教澤云著有獻花山房詩文集子三榮祖念祖業儒思烜優廩生孫康庠生餘皆業儒

譚顯相號槐省家貧苦心力學食餽後資館穀以養
竭誠教誨門下多所成就生平遇事仗義執言面斥
人非有王彥方之風道光辛巳舉於鄉與同邑銓部
夏一鄉爲南北榜齊年己丑壬辰相繼成進士又皆
列魁選闈藝出京華藉藉攸人士矣任刑部陝西司
主事勤慎明決爲大司寇劉筠圃先生所倚重總辦
秋審擬授提牢改授光祿寺署正旋應江蘓徐州府
聘主講宿遷鍾吾書院督課生徒一如家塾將入京
補缺因當道懇留復席忽患河魚遽捐館舍子忠炳
聞訃奔喪諸門人弔送者哭失聲謂經師人師數十

年所未見也著有思菴堂文集養愚山館詩集藏於
家

文苑

明

王以德學有根抵師事同邑陳克恭先生洽通經義不求榮進登第後仍杜門研討蓋學而能守者

董俊字時髦爲人不修邊幅而大節卓然可尙正德甲戌以歲貢入銓部授歸德州司訓迂道省親比抵任已違程限藩憲察其情釋之未幾仍乞終養遂不仕事繼母黃人無間言屢舉鄉飲大寶

陳樸廩生負才倜儻究心時務爲有用之學易西泉太史雅推重之生平好古崇禮篤於友誼惜早卒

龍天衢字道行參政誥長子生平沉毅剛直砥行不
怠事祖母譚以孝稱延安成名師與諸弟研究經
學慈谿秦公宰攸數載見其非公不至尤重其品
歐陽廷儀字九舉工詩姑蘇杜庠令攸嘉其學行推
爲社師

陳宗澤號梅峯諸生風度端懿言簡性介萬歷戊午
秋賦已入彀會房考爭甲乙名仍落孫山常授經
他所母有疾忽怵怵心動卽束裝歸虔禱疾良已
承歡者又十餘年晚歲續纂家乘割產助祀於本
行尤敦云

易圖舊志列詩人條內有詩見攸詩拾殘

周元字楚白縱遊四方物色羣豪江夏熊廷弼爲諸
生時周傾蓋異之倒篋以贈及熊任經畧周出關
訪焉居數日拂衣徑去熊遣使追贖兼金周却之
貽詩云平生裘馬氣翩翩不惜黃金結少年今日
蕭條君不問夕陽秋色爲誰憐

陳明教諸生高尚不應科舉著集唐集杜爲時所重
劉自焜字樸先由明經官中書舍人有詩名

文士鵬字垂雲諸生工詩著澗閣集晚游於酒以自
劉淑章號鳳臺由明經任建昌府教課士有成後

新城令一錢不受居鄉仁厚謙恭兩舉鄉飲大賓
劉仲典字漢水歲貢官景陵訓導工詩築別業於鶴
林鹿苑中時人比之輞川

文萃號沙田增生績學敦行爲士林嚮慕晚研究宋
儒諸書設教沙溪關洛閩緒言解悟尤超子鳴邦
選貢鳴鄒廩生

皮曰謹廩生博涉經傳學有根柢出其門者師承不
苟弟曰偉姪質相繼登賢書膺拔萃皆謹所裁成

皇清

陳師字文淵桃文先生長子博學嗜古有父風不樂

治舉子業縱遊四方卒於雲南太守署主人悼之
郵書爲歸其櫬

蔡而偉字韋人號雪航閉戶研經吳逆之變不受僞
辟著有雪航集子祖桓祀樸相繼舉於鄉

洪五臣字心子工詩方伯李長春得其詩心賞之因
携之偕入都肄業國學尋以病卒遺稿盡佚

陳五咸字香署諸生明叅政廷連元孫布衣蔬食吟
咏自適著詩若干卷

劉伯樟號嶽英諸生著有自怡堂詩集

蔡上藹字如春郡廩生工文中丞丁學使蔣雅重之

聘爲嶽麓山長說經爲學者宗著有志遊詩集五
峯制藝行世

陳梧字鸞栖郡廩生性坦易嘗冬行遇老叟凍脫裘
以贈三藩初平武陵令李爲觀以軍政獲罪時大
旱中丞丁甫蒞事得澍雨梧作喜雨賦數千言李
假以獻得釋李致謝梧笑曰故人知君君不知人
吳雲際字從菴撥入醴陵學廩生豪邁嗜古邑侯余
延爲內署師工書法櫺星門石額其筆也著有西郊吟
譚斯振諸生與同時陳滄洲費瞿如石天峯諸名宿
唱和有詩集藏於家

劉兆楷字孔林監生丰神瑩秀人以衛玠目之喜吟

詩山水佳處輒怡情年二十六卒

蔡上禹諸生爲文刊落鉛

筆詞輒前茅家貧力學不
事生產爲鄉黨推重

洪際桂字月桂諸生孝子吉臣少子性高曠耽經籍
所著有大學講義尙書發微鄉會題辨旨

王璟臣字如珩諸生朞月失怙母洪氏教督成名工

詩文

劉三重字徵子增生負雋才與弟三命同懷相切劘
每文課角藝以短兵制勝人爭避舍號爲雙鷹尤
敦本行先世墳田久鬻於人重踵門情告其人感

動得叔贖守墓有傷墓吟詩四首讀之令人淒然
洪際瀾字波遠諸生家貧嗜古讀書嘗達旦不輟督
學姚愛其文拔冠童試著有易經心解子鼎諸生
劉應浦字文若諸生讀書有識自謂非先秦兩漢之
書不寓目性溫和無偏執兼工岐黃有濟人奇功
張之蘭增生性剛不諧俗士林矜式九試棘圍文名
藉甚子四俱諸生

張文鏢諸生幼喪父事母克孝篤學工文七試三薦
諸弟經指授皆擅文名著有羅浮山房詩集

賀國依字京斯諸生年少博學自負經濟才惜早卒
陳捷發字畝夫廩生少孤露困於記誦每讀書積五
百言帀月乃徧旣成誦滌卮盛菽朗誦出菽爲籌
卮罄乃適於心口學成遂擅文譽生平勇敢有智
不畏強禦邑公事多倚之

歐陽士滋廩生攻舉業有聲試多冠軍著家訓嗜古
編及試帖

劉其灝字隆若郡諸生性敏學博下筆極雲淨天空
氣蒸波撼之概髻年入泮受知學使王時兄其渤
歲試亦冠軍王贈句云探珠學海雙珍見看桂文
園兩朶榮

鄧鼎譽字子望廩生文筆灑落出塵學使笑謂之曰
二陸入洛之年乃爾英雋耶自是聲譽日隆未三
十卒

謝帝眷字佑菴廩生性敦重爲文理法醇粹有聲壇
坵年七十餘將貢而卒

文承軾字孟蘓諸生豪蕩有奇氣應科目不售遂縱
遊名山所至輒留題咏有集曰山澤吟年六十忽
召故所契門下士痛飲相訣語不及私將卒歛遺
書及自爲文稿什襲扃藏之酌以卮酒曰以此爲
名山之藏

陳治本字大原諸生制藝步武先民遊其門者俱有
師法雖風會日開而規範自遠

鄧承祖字蘭蔚諸生自少篤學長爲名師教授衡湘
以通經著所著有詩集文集

劉應洙字魯泉博涉經傳兼通倉公書性敦厚人目
爲渾金璞玉壽八十七以子榴官訓導贈修職郎
尹作誦字捷三與同里名士廖渭川友善家窶績學
研討二程遺書輯大易講義

劉自燧字嶠若諸生學使卽墨黃公仲霖於經義外
試平沙落雁詩奇其才特拔之巡道南陽彭禹峯

廸爲院長命其子師之康熙二十三年邑令余三
奇補修邑志公舉熒纂修志成郡守見其序事詳
核復徵修府志著有螺溪草堂集

陳容廣字宏菴爲學尤邃於禮經時喪禮多簡廣父
沒獨盡禮俗爲一變

洪圖昇字平客諸生果毅能文有富豪希濫厠鄉賢
昇昌言於衆事乃寢

蔡祖昭字明卿諸生弱冠知名性不徇俗家事悉遵
古禮舉九子一堂雍睦先後俱列膠庠邑令朱敦
請爲鄉飲大賓贈額云爲人倫表

蔡山枚字廷舉諸生博涉經史陶情吟咏著有步麓
詩集生平孝友尙義晚歲杜門授經四子炳觀芳
沅次第遊庠

陳五章字文友諸生父國學任衡陽教諭章侍養官
署訪求知名士學業日進晚綜理家政爲族表率
譚之德字仲山廩生性溫恪爲文醇雅與弟諸生之
衢並負才名嘗講學湘醴間年七十輪貢而卒

蔡上泗字相淶諸生鄉闈五試五薦兼工古今體詩
嘗一至都門名公咸物色之著有碧山堂詩集黃
寶菴太史爲之序

文如人字潛以諸生自少嗜學擁書千卷丹黃批註
叩之如夙記制藝尤工

廖夢麟字鳳階舉人負才倜儻漁獵百家與弟夢熊
夢鯤俱有名湖湘著有澹谷詩鈔金陵懷古草

劉自涓號又陵諸生好學苦吟事親克孝惜早卒

胡紹虞字嗣宗諸生言動不苟事繼母三撫幼弟二
孝愛無忤修學宮捐祭田掩遺骼嘗從茶陵州館
歸宿王社舖時有鬻子償債者解囊全之

謝士賡諸生好學通經授徒著名家貧竭力養親三
十而鰥奉母命不再偶著有詩文集子君選諸生

劉應潛字伊人諸生一編相對門無雜賓遇素心輒
論文忘疲清標雅度士論推之

譚聖典歲貢工文敦行舉鄉飲大賓邑令余三奇請
啟云大節夙端於庭除細行不忽於日用聞者以
爲定論

陳詩字車書髮初燥吐辭輒驚衆日記三千言旋運
之腕下與弟燿就試輒列前茅邑人稱爲連璧

唐天柱字石擎邑文學勤學敦倫外和內剛操履方
正嘗倡葺泮宮及建宗祠憐孤恤寡世傳其盛德
子孫列國士咸遵庭訓擇壻選拔劉介輝進士余

潮仕宦有聲人稱藻鑑乾隆丙辰 賜八品冠帶
天柱年八十有六鄉先達公舉之固辭茶州知州
王式淳聞其賢同邑令戴國祥造廬謁見加禮稱
爲堅白處士

易兆乾字諦則諸生少負文名家饒而喜推解故人
子譚某少孤無依爲營婚配族有窘者悉周之不
稍靳主戶事捐貲修祠置祭田壽八十邑令陳公
溥爲立傳

劉傳霖字天岱府學歲貢詩文兼工好學至老不倦
手抄經傳辨析音義學者宗之子甲燁諸生

易生龍字吟雲監生胸羅唐宋詩篇有孤松亭集杜
邑令陳溥序之事母焦以孝聞母病刊經虔禱尋
愈兼置義田設家塾

蔡方亨字幼苾諸生英敏風雅著有梅村詩集子來
燕來皖俱諸生

張之蓮字浚日諸生著有綠塘集
陳五松字宗筦豁達不羈文酒嘯傲無虛日年逾五
十徙居攸北柘桑子灼能養父志徜徉林泉廿餘
年一日獨酌庭樹下端坐而逝

劉昌瀛字彙登廩生天才英異文筆鋒發韻流與兄

漢澍潤並樹幟藝林瀛尤名噪一黌有國士之目
惜不永年未竟其才

劉昌明字曉川諸生好學力行居家以孝友爲先與
弟昌期共相切磋羣從率其教俱有聲庠序一家
僮逃湘貿易有貲積僮沒爲經紀

其妻女一毫不取人咸義之

劉步發字映武甘貧力學困於童試八旬始以府試
冠軍入泮督學陳目爲文壇老將壽九十六

劉樹琛號介菴廩生性端嚴讀書具識解師事叔豐
齋先生敬禮有加後授徒萍鄉醴陵問字者屢常
蒲孫坦之諸生

劉嵩字岳中廩貢早擅文名爲督學吳賞識年逾八
旬猶困棘圍康熙辛卯入毅額滿見遺壽八十七
劉應沂諸生工詩著梅花百咏教授生徒必矩矱先
民邑令許爲誌其墓子樹瓚諸生

劉重輝字燦天副貢入都交海內鴻儒自謂學未淹
貫座師周絳侯欲吹噓之不就遂南歸築叢桂書
屋研究經史時昆季俱宦遊重輝獨侍北堂及母
歿哀毀卒

張濟泰下帷攻苦文筆清澄無滓教授鄉里多所裁
成以明經需次訓導卒

賀輔宸號彤亭歲貢力行好學屢試未售沒泊寧靜
有端人之目

陳國宋號懷白高會以來文章仕宦頗著聲宋少工
韻語隨祖待訪歷宦滇南山右往來都下其西歸
雜吟有出函谷關詩云鎖鑰三秦第一關自然天
險絕塵寰帶圍垣外半灣水壁立城邊萬仞山欲
假青牛出谷口慚無紫氣到人間當年楚漢爭先
入惆悵書生獨往還

洪俊字靜軒幼讀書金仙觀晝夜攻苦不爐不扇弱
冠入泮作四書文四藝學使奇之雍正丙午舉於
鄉座師賞其文以爲不食人間烟火授新寧教諭
未之任卒子青書附生孫開拓歲貢

文應第字及仲舉人五上春官薦而不第隱居邑東
昭村闢家塾訓子弟以通經學古爲要著有昭江
文集十卷詩集四卷子爰歲貢瑄珠諸生孫德炳
舉人

洪如衡字權武篤行嗜學雍正壬子舉於鄉三試禮
部薦而未第爲文力追金陳晚尤閉戶窮經深得
註疏之奧

龍思翰字羽朝增生讀書默識行坐若迷乾隆庚寅

已擬魁選因策疵被落房考惜之子麗諸生

陳大相字九命號簡齋舉人七齡隨其父星完僑居省垣碧湘街弱冠遂寄籍善化制義宗郝京山謂其清古純細非隆萬他家可及說經嗜鄭註謂其發明經旨實與經埒著有三禮劄記執二親之喪先後扶櫬反葬於祖居邑西關地名橫壩和雨地前歲時瞻掃不愆於儀族人咸稱之

陳升溥字海茹號盈川增生學有師法文主醇正其言曰涵泳儒先博觀慎取攝於方寸抒之簡觚所謂明且清者必取則乎此聞者奉爲篤論六齡失

怙事繼母如其母事兄增生敏中石濤數十年恭順無改子開棠能文早卒孫履青諸生

陳述遵字道川號芸汀邑諸生試屢冠曹丙子科房考擬薦元因二場微疵見抑邑進士王念亭贈詩云敬禮評人俱縮手劉蕡黜卷盡傾心性嚴毅嘖笑不苟已刻芸汀時文行世友教萍醴各邑門下多知名士有望灑軒詩文集滄蠡草經疑藏於家年九十卒子燾副貢杰諸生

陳宏觀字文瀾歲貢少負雋才清修玉立與同族春江太史並爲名諸生一時有瑜亮之目善臨池於

淳化閣本及長沙官板能別其真贗楷法尤工秀
爲文清麗芊綿數十年傾動場屋試多冠軍自訂
有歷試草子蓮諸生

文渤字東表庠生工詩文有集主持戶事族衆推服
邑令陳嘉其孝友端慤粹然無疵廣文徐贈以教
成於家之額子德楫德模德邁監生琳諸生

陳建章號侶漁國學生少攻舉業屢赴棘圍植品端
方歷任邑尊皆雅重之尤妙解琴理工書法先世
所購古琴法帖獨有心得藏書數千卷悉善本臨
終手書示其子斯秀斯舉云琴若干書畫若干揚
本及籤函若干手澤也珍之其高致如此

洪維字世衡號新齋弱冠受知吳牧園學使生平孝
友耿直作文不落時蹊應鄉試十三科以五經就
試者四科癸酉薦而未售晚年閉戶課兒嘗手抄
三禮左氏內外傳國策離騷史記諸讀本朱墨紛
披藏於家塾子吉髫齡采芹乾隆乙卯由副榜登
賢書孫紹祖未弱冠補弟子員

蔡貽震號知齋爲文宗先正戒門下士勿趨時好故
所裁成多超流輩惜數奇以明經老

洪謙字利搗號牧圃諸生弱冠蓄畬經訓名噪一黌

與陳春江太史同受知於督學阮春江嘗謂我遇
牧圃當退三舍會以五經卷鄉薦未售敦尚品行
獎掖後進出其門者多有文譽壽八十三

余泳號心齋歲貢少負才名試輒優等鄉闈屢薦以
教授著名

王萬象號醒齋郡諸生工制舉文爲名宿賞鑑歲試
例得食餼聞親病遽歸後屢受知房考不以得失
介意生平持正不惑於釋道及堪輿家嘗著論排
之間留心素問得其奧旨隨試輒效有江右周某
父抱痼疾迎治獲痊謝百金却之年八十餘一日

在家塾講論語某章暢修身俟命之旨甫畢瞑目
而逝著有醒齋雜錄事類補遺

陳述祥字振彥號研溪諸生端嚴不妄交工楷書手
抄經籍數百卷皆治熟精詩律俎豆浣花翁經指
授者不失唐音年七十好學不倦業師王念亭嘗
於雪夜二更偕祥姪炯訪之見祥篝燈展卷沉吟
自若嘆曰卧雪遐軌不足方也著膾經堂詩集
文華國字朝烈植品好學緣事屢受牽誣凡三入泮
三食餼兩薦鄉闈壽七十七子自雅諸生

余湛號鑑亭歲貢十歲喪父哀毀如成人爲文主理

法鄉試迭薦門下士稱盛子世桓世梲俱諸生

夏乘盛字時出廩生與父茂桃後先食餼爲文風骨

高騫衡山曠岫嶮太史亟稱之孫錫圭諸生能文

洪開湘字楚川優廩生少篤學通經傳爲文沉摯有

骨力鄉試再薦額隘見遺學者至今稱之

王純鏗號惕齋弱冠食餼與兄純鎔齊名詩文雋穎

鄉試五薦以明經需次訓導未仕而卒

陳炯字範哲號浚軒諸生制藝規撫天崇兼工詩古

文詞子啟疇肄業嶽麓攜其文藁篋中山長羅少

卿一見歎爲名下無虛乾隆己酉疇受知學使錢

南園拔入成均時同拔者善化秦敬衡平江向曾

賢皆楚南名士知炯宿學俱以所業相質素性溫

讓喜獎借孤寒栽培不少沒後有言之感泣者羅

少卿輓句云龍溪道脉嗟流水華嶠仙踪悵斷雲

可髣髴其梗概著有凸亭書屋文集編杜溪

詩草十卷

劉祖穆字雲泉乾隆庚寅亞元五策進呈再上春官

不第卽專力教授萍鄉進士蕭光浩亦其高第弟

子也所輯策學要約舉業家奉爲枕中秘弟祖程

子德輝姪德薰俱諸生

賀志颺原名翅颺諸生博學工文與諸兄名噪一鬢

中遭家難同懷兄四人先後逝志颺獨持門戶遂
沒於舉場姪鏗鏘相繼入泮爲名諸生皆督課力
素性嚴正人有過面規不肯毀人亦化之著有讀
史偶評四卷晚歲杜門課子罄手錄孝經爾雅暨
宋五子書講貫不輟其立教具有師承學者宗之
歿後二十六年學使南匯吳公省蘭誌其墓

胡光業號謙齋歲貢讀書具卓識古文蕭疎時文清
雋所刊入試牘數藝畧見一斑錢南園宗師按試
長郡亟稱爲作手尤工行草書晚益瘦硬通神每
酒酣揮毫見者驚爲米顛遺墨真一時無兩云有

謙齋制藝藏於家

龍升歲貢文筆浩瀚有異水湧泉之目乾隆丙辰學
使阮准舉孝廉優行後任邵陽訓導子允傳諸生
蔡協中號虞民恩貢任鄱縣教諭自少力學老年不
倦恪守傳註爲學者矜式壽九十三

洪開灃號竹嶼歲貢幼失怙事母劉孝與兄楚川同
懷切磋師事中淵張甄齋先生所著詩文甚富應
鄉試十五科邑令張勉齋延掌本邑震陽書院士
習益振年八十粵西廉使固陵祝公撰文郵寄爲
壽極推重之子四蔚文附生藻文廩生

文自奎號西垣九歲能屬文弱冠舉於鄉專力稽訊制藝及詩古文詞皆深造有得以計資銓授澗中縣令改任武陵教諭課士嚴明再授靖州學正不就解組家居晚所業益進著有涵泊書屋文集鷺溪吟詩草子舒鎬監生舒鐸諸生

陳焯字仲晦號省齋父述遠早世兄熾績學力行焯師事之為文高渾有則乾隆癸卯中式再上春官不第仍理故業教授里中所居護筠山房手抄經傳古今文千餘卷能倍文貫穿子啟畛啟昫

洪開拓字錦川歲貢穎悟好學屢為宗工賞鑒教授數十年師範甚著

王泰字逢之歲貢進士純錮子與弟諸生淑歲貢濂力紹家學互相切磋一時有三鳳之目泰文以理勝淑以才勝濂以度勝而淑尤熟於史學韻語各有得力均不愧名父之子

龍思慶字學拜國學生淵源庭訓昆季相繼登科颺性高潔文亦加之自以不投時好一赴秋闈遂無意舉場書仿顏柳有天得藏者珍之子標孫新命俱諸生

鄧德芳字蘭曉素行端謹文亦謹嚴以明經需次訓導未仕卒子枝秀諸生

蔡文炳諸生幼穎敏父上桂攜課於祖來儀官署中
記功百倍才思煥發雍正壬子科同懷五人俱以
五經應舉榜發仲兄煦獲雋自是益加淬厲文名
大振子貽基廩生

王績熙增生少有文譽兩冠郡試郡守馬深器之與
兄緝熙銳志科第鏖戰棘闈屢以額隘見屈藝林
惜之有文稿藏於家子廷鑑

皮祖禮歲貢爲文洗滌塵氛有清深之韻居邑東水
頭與兄祖義弟祖信閉戶窮經翛然物外以明經
余游諸生工文不利舉場課弟湛貢成均人誦其友

蔡貽基廩生性淳厚有學癖於三禮三傳及爾雅說
文手鈔成帙畢生鑽研嘗達旦不倦乾隆壬申癸
酉壬午三科鼎薦己亥抱恙入闈勉成五策詳明
該洽同人推服旋以疾卒子光斗歲貢

劉崧字峻中增生通經學有識解子傳黃食餽爲姚
雪門學使賞鑒其學悉本庭訓崧性剛直釋忿解
爭人帖然自服族五鳳託孤不負撫育里通衢丹
陵橋北倡族重修蓋文而有行者

陳逢年字西豐廩生學有師法尤工制藝文筆矜錄
不墮時趨李幢門學使評其文爲慘淡經營不以

揣色諧聲鬪捷可見一斑惜老於塲屋以諸生終
劉楚耀字湘溪宗仰文止思曠乾隆丙午鄉墨爲鄭
雲門羅衣樹兩主司所擊賞謂其神似徐羅闡中
耳目一新晚益精詣每一脫稿輒儻然拔俗截取
縣令未赴任卒子世松監生孫培祖諸生

陳擢吉歲貢制藝以警闢勝貪常嗜瑣者望之却步
老於塲屋不易其趨設教因材施教獎誘力不贖者之資
蔡錫三字棠涸學有根柢制藝密栗堅銳錢南園宗
師尤深鑑賞由舉人任麻陽教諭以經訓課士學
者翕然宗之卒於任子元淦職員元浩監生

夏維典字五長廩生爲文峭折靈矯一洗塵土面目
屢爲宗工擊賞工書法得聖教序筆意小楷尤能
於沉勁中出姿態嘗謂元好問論詩云乾坤清氣
得來難作字亦然故其詩文書法皆獨出冠時云
洪藻字昭度增生工詩嘗授學於金仙書屋講貫精
洽晚自訂金仙詩草

洪亮號寅齋家有藏書流覽不輟嘗曰觀書如觀山
揚子洵有味乎其言之也自少至老家計絕不經
心惟顓顓稽古乾隆壬子已入殼旋被落後以明
經司鐸永州卒於署子三開春吏目開翹均成名

賀鏗字震聞少承家學早著文名祖瓊珠父對鳳俱以大器期之弱冠入泮歷試高等年三十一卒案頭枕畔皆文稿也遺孤榮清八齡依伯父錦以居蚤歲食餼卒孫昌杭諸生

彭友德號芝亭恩貢夙承庭訓學王敦行父世景兄弟合爨百餘口德體父志無私蓄父歿恪謹不渝遇忌日祭奠哀思手錄呂氏鄉約隨事開導誘人以善里黨化之子瑚廩生琳國學家模諸生

陳錫九字叙倫廩生少孤事母孝養與弟錫三同懷相師友分題角藝至忘寢食才華敏贍時賢交推

之弟歿課姪占寅入泮子應桃增生

在文名所著詩集藏於家

何世縉字琚紳諸生少從學同里龍襟江先生襟江故端儒縉師事惟謹以廉隅自飭生平笑嚔不苟卓然有古處風兼工書善琴繪事亦超于家璋廩生家培巡檢孫本洛諸生

胡贊業號靜齋增生少穎敏嗜學博覽經傳試多高等兼究心六書精篆隸平生教授有方出其門者咸得所師承壽七十餘

蔡天錦字孫雲廩生幼失怙事母劉孝工制義屢爲宗工甄拔鄉闈七試亟薦年五十餘輪貢卒妻譚

氏延師課子長文泮監生瀛萬諸生孫職員樹木
因祖捐貲施茶南鄉另捐田五畝以繼先志

譚國定字一正諸生工舉業名噪一黌應鄉試十三
次乾隆甲午己亥兩科俱爲房考擊節呈薦子彥
亦好學能文屢試未售與父並膺六品封職年逾
五旬猶手一編不倦著有層封堂稿

張善增號湘浦諸生進士光華少子幼善屬文長益
精詣力紹家學雲陽周桐圃太史極贊賞之性恬
淡不務聲華晚歲家居訓課諸子皆率其教有聲
藝苑子太積鈞監生積鍾貢生正中諸生

蔡典字敷五廩生潛心儒先傳註間及詞賦以郡試
冠軍入泮學使阮卽以大器期之乾隆庚子科卷
已入數得而復失房考扼腕甲辰學使錢按試長
郡目爲夔喈老荆年近七旬感於知己益自奮終
不遇士林惜之

單廷棟號松雲恩貢立品端方學者以嚴見憚丙午
鄉闈額滿抱抑不以介意闢松蔭書屋廣授生徒
訓迪有方子煥訓煥訓俱諸生

劉昌期號可齋增生夙有文名乾隆庚子房考力薦
見遺嘉慶乙丑

恩賜翰林院檢討掌教本邑書院學者稱之

夏維葵字東園少負雋才文有紀律應童試未售弱冠入成均七赴鄉闈課子燧焯遊泮食餼晚益敦行經紀戶事化導鄉里族黨咸欽

鄧德騏字遇伯號坤山少承家學與諸弟並擅才華父宦江左騏往來毗陵震澤訪求鴻儒所業益進爲文雅馴無蔬筍氣乾隆己酉舉於鄉任慈利教諭兼掌陵陽書院以疾卒於署弟德駒庚申繼登賢書善楷書工制舉文禮闈再薦座師蕭山陸平泉先生尤厚期之亦卒於江華教諭署

劉維椿號策筠髫齡入泮祖啟解組家居尤鍾愛之長益博通下筆能以清氣自衛詩文不多作有作皆妙新奇致生平慎交遊不面譽背毀友有過必直規策筠沒士論以爲不愧直諫云

胡自湘字起三廩貢任常寧清泉訓導生平廣貯經籍流覽百家而不喜瀨祭爲文入理泐然姚雪門錢南園兩學使曾鑒賞之所刊入試牘兩藝猶見先正規範

陳昞號予田廩生春江太史長子年十二入泮品秀文工督學仁和李公異之攜入內署贈以詩句旋

食餼肄業嶽麓有文名年二十五卒嶽麓同學瀏陽胡光北有夢中與予田聯句詩末句怕有離人在野橋則予田句也計其時日正予田下世之夕咸惋惜之

蔡鳳翔字象六廩生少有文名由郡首入泮石琢堂宗師得觀風卷詫爲作手拔置第一畢生不履公庭耿介之操士林重之年六十一輪貢而卒

張夢徵字梅作諸生授徒邑歐公山巖湖菴歷二十餘年負笈者不憚跋涉性剛方無阿比設教則從容有序學者宗之子家駿諸生

蔡大祿號柱橋幼穎慧父上宰任湖北藩庫大使攜課官署遂以髫齡入成均長益嗜學文有內心鄉闡兩薦乾隆辛卯房考梁公濟生尤以國士目之肄業嶽麓山長羅公慎齋深加賞異年六十五卒文承寅字人元少承庭訓作文爲簡之師以少許勝多許傲岸試膺卒老諸生有人元文集于治光監生劉泗霖諸生有文名兄弟早逝獨身溫清孝養克敦至其教授有方子弟及門下士無枉其才者

王廷颺字殿拜諸生居北鄉並塘祖締章父品山世有隱德颺師事姊丈余麓泉爲宋儒之學言動有

法闢榴花書屋率子弟肄業其中讀書制行實有
端緒邑詩人彭湘南贈其父品山句云過庭宜令
子式穀見敦行蓋兩推之子學熹監生捐墳田置
祭產多義舉孫錫麒錫麟

劉玠字兆徵號與耕附貢敦本崇實辨於義利嘗手
錄古人格言成帙日存心省晚好山水有園題曰
日涉所著詩文甚富年八十餘卒

胡聯科字捷甲諸生嗜學不懈於經傳能擷其菁華
乾隆辛卯闈卷大爲房考激賞家居訓課不履公
庭人欽其品子新優增生泰業國學孫鴻文國學

胡自嶽號方圃歲貢天性純孝素行端謹父祖儀性
方嚴嶽承順無幾微忤友愛異母諸弟數十年如
一日爲文恪守先民不墮時趨課于景開登嘉慶
辛酉賢書嶽亦以是歲貢成均旋銓選卽用訓導
方圃沒士論以爲真質行儒者云

劉羽儀字鴻達諸生品端文優教授有方二子寅澍
俱諸生曾倡修日星雙溪二橋以便行旅

劉姓號鹿甫與兄學生同入泮友愛甚篤性雅潔喜
臨池年八十餘猶能作大字法書

尹學熹號敬亭少穎異茶陵宗人情田孝廉一見目

爲千里駒弱冠遊泮學使李賞其文有英氣所作
詩文成帙年二十三卒

張綬諸生學有師法性嚴毅授徒以躬行實踐爲務
裁成者衆其孝友端方族黨無間言子恂諸生

彭述號信夫諸生鶚薦未遂遂闢家塾專力訓課生
平嚴取與篤倫理敬宗收族不愧質行

陳宏人字從大諸生孝廉其叔長子叔年邁任道州
學正解組歸宏人偕妻賀氏奉養無缺書聲與紡
績聲相應宏人沒遺孤先庚賀視如己出督課入
泮未幾翁卒喪葬盡禮先庚英年苦學賚志以沒

賀復撫姪孫鴻猷承祀族黨閔之

劉霽輝諸生優廩生劉傳登子幼穎異日誦千餘言
十歲赴院試默寫五經學使賞之後以冠軍入泮
有文名竟賚志以沒子增烈甫八齡妻吳氏妾徐
氏媚幃共勵紡績督課增烈名列膠庠

劉坊表字翰亭少負雋才從學於堂伯介輝一經指
授服膺勿失邑令馮拔冠童子軍補博士弟子員
文刊湘南制藝楚材觀止集中旋貢成均生平事
親以孝待友以誠言行不苟絕跡公庭里黨矜式
尹廷棟字紹周增生歷試高等數奇不遇子兆熊能

讀父書弱冠采芹頻赴鄉舉耄年猶耐風簷壽九十一孫爵三

陳惠字仁五事繼母袁孝績學砥行遠近宗之著紫金書屋詩文集武陵趙邃樓方伯爲作傳載藝文劉傳謫郡庠片厯試優等早擅文名幼失怙恃事繼母尹孝晚弟傳謀生甫九片撫督婚教族有艱於嗣者爲承其祀有犯祖塋者力護松楸主戶事矢公慎子萬縑國學孫世珪廩生世瑛諸生

劉大經字綸五優廩生文品峻潔行己端慤居城東未嘗一指宰官父樹棧出繼叔父以其產與兩兄均分經承父訓不失令名子彬枝職員

李士鼎字貢九諸生父能臣庭訓甚嚴屢從名宿講貫於經義極有體會晚年教授生徒以器識爲先文藝次之沐其誨者終身不忘年五十三卒子光烈廩生

陳峻號秋田增生春江太史少子兄晔晚俱早世晚尤好學強記父悼之甚峻天才英異家存醇樓藏書甚富涉目能泐其趣旨弱冠工詞賦銳意取科第歲試輒冠軍數奇不利舉場愈睥睨一切以文酒自娛年近五十卒遺稿散佚有賦數篇流傳

余之江字楚望弱冠入泮爲文秀骨天成擬諸初日芙蓉屢試棘圍咸以遠到期之情早卒

胡經字魁五諸生九歲失怙依母余孺慕不衰從師績學年逾四旬始列諸生閉戶研經不安結納人以醇謹長者稱之子自衡未冠入泮有文譽

劉光湘字震三廩生力學工文嘉慶戊辰闈卷爲房考藍山令譚公賞識鼎薦見遺賫志歿于煥章能文

劉壯之有全傳載藝文

王廷價字濟之大學生天性豪爽嗜古不倦見有異書輒喜摘錄恒以積善讀書勉子姪晚年築仿芥

別墅朝夕吟咏其間著有仿芥園詩鈔子之芳監生之夔庠生之蔚之芑業儒孫珍篤庠生

洪品字三貢增貢生居邑東漕溪代承家學藏書頗富闢半水園亦舫書屋稽訊之餘間資吟咏品於春江大史爲內弟春江有題半水園詩云餅汲能添花木潤雲來欲護稻田屯憑欄筆點邀涓滴倚石詩裁露本根其高致可想年踰八旬卒子書田

麟紳麟麗

楊士龍廩生英年績學嘉慶甲子房薦見遺益肆力於古從其遊者皆有師法江右王鼎魁寓攸聞母病不得歸龍以束修金贈之人高其義

羅文光諸生工文事母任克孝友愛昆弟至老不衰尤篤於族誼僑居省垣攸宗人咸稱道之

陳之綸字天燦少負雋才文有內心屢列前茅仍困童試年甫壯卒于長春增生

余文德諸生端品好學浚泊自如屢試優等以教授著聲

丁啓鶴諸生性穎異有構語皆心得陳寅閣師決其當以文名於時惜早卒未竟所學

文苑

陳錫東字寅閣幼穎慧十四入泮旋食餼每試輒前茅爲文出經入史兩刻試牘屢困棘闈房薦堂取數次未售成就後進科名濟濟四十餘貢成均年近八十選授嘉禾司訓仍赴棘闈又邀鼎薦六載致仕歸八十六卒子鳳翥鳳儀孫龍翔均入邑庠陳啓疇號叙齋選貢積學工文試藝閎深肅括力追先輩爲錢南園學使稱賞列入拔萃科生平孝友克敦兄惠早卒撫孤姪得入邑庠年六十選授黔陽教諭踰歲歿於官署著有咏史擬史樂府麻田

詩草板藏於家子自祺監生諸孫皆能文

歐陽立燿字錦臣歲貢生性敏悟幼從長兄孝廉蔚田君學文名藉甚又遊名宿文東洲門入泮食餼試輒冠軍膺鼎薦者七科皆以額滿見遺士林咸惜之年五十貢成均未及銓選而卒

鄧德驥號展亭歲貢生幼承庭訓與兄孝廉德騏弟孝廉德駒互相師友爲文清腴雅鍊工詩賦吳穀人學使選入副拔

歐陽逢昇號曉亭增生少讀父書弱冠采芹嘉慶辛酉鼎薦見遺其後屢薦未售益肆力於古從學成就者衆皆有法程有吾江草堂文集並課藝家訓子文謙監生文詮文諤俱諸生文論業儒

詹燾初從本邑廩庠唐永垂習舉業一宗天崇大家殫力經史繼遊張陶萬曠岫巖兩先生之門博通經籍詩書易三禮三傳皆背誦如流作文別出心解兩先生器重之茶州孝廉尹情田本邑太史陳體齋孝廉陳鳴鶴易嚴六諸先生咸推爲作家以性好刻苦縣府試屢列前茅未售年近四十始以縣試冠軍入邑庠卒後受業姪督孝廉尹學積哀集其文僅得數十首爲序存之

歐陽榮洵字少泉號竹江國學生幼警悟七歲通音韻能詩強識十歲而十三經畢讀攻舉業爲文力追先輩而躋童子軍遂絕意進取益博極羣書凡諸子百家靡不披覽善誘進後輩講說經義罕譬而喻其猶子憂龍流其教舉於鄉性孤介抗心希古嚴於取與之分所著古文詞賦甚夥久而散佚存有竹江草待梓

陳石麒號筆山體齋太史長孫夙承家學博涉載籍爲文清圓雅鍊咸目爲異才期以大器前縣至善取冠縣案入泮歷試優等然屢困棘闈薦而未售年四十賣志以歿遺腹生一子繼室賀氏矢志撫孤龍 彬字均甫諸生爲文慕岸不羣力追先輩不落時谿入棘闈者十五壬子薦而不售餘皆不遇知音性方鯁設帳諸家專嚴不惰雖盛暑必整衣端坐年六十卒子友夔優廩生

陳其燦號月潭封職兆最第六子性敏慧工文自然大雅不入纖巧以縣試冠軍入泮業師孝廉文定齋進士譚槐省哀其早逝搜葺遺草批点刊行號月潭遺稿定齋丐座師李夫子觀察爲之序

蔡光斗字闇堂歲貢生家貧苦學少承祖孝廉及父

諸生貽基庭訓後復遊歲貢生劉章齡門下年三十食餽肄業嶽麓城南書院銳志功名潦倒場屋乙亥貢成均家居設帳年七十九卒

歐陽聲鏐號石城優廩生少從伯父鶴泉學復承父湘屏庭訓幼卽能文以縣首入學旋食餽學使祁春圃亟稱賞之乙未科試冠軍擬列拔萃科以微疵見棄遂病卒子大淳大滋俱業儒

李春芳字宜園積學工文試輒冠曹受知於學使者祁春圃取入乙未副拔性惆儻不羈丁酉薦不中程遂抑鬱而卒

賀景字煥明優附生賦性聰穎文筆清而腴少從陳寅閣前輩遊與長兄附貢生昇互相切劘弱冠補博士弟子數戰棘闈未售遂絕意進取隱居山莊琴書自娛超然物外惟以詩禮訓其子姪壽躋古稀而卒著有紉蘭齋時文藏於家子三長大有次大定監生三大雅業儒孫曾俱皆能文

陳洪慶號景雲原名星慶優廩生幼穎異甫四齡祖貢生棠蔭攜入塾日記千餘言十歲應童試邑侯馮以大器目之弱冠補博士弟子員旋食餽十八棘闈薦而未售學尙博涉卽卜筮律呂青囊諸書

無不考究生平剛毅自持取與不苟非考期不履
城市凡事關學綱直言不諱將貢而卒士林惜之
子一聚禧業儒

賀鑾字玉坡生四歲而孤從選君晴峯學穎悟過人
經傳研求熟復爲文矩矱先民不苟趨時好習楷
有晉人麗風以貧故授徒澹江不但講授勤且能
慷慨仗義出故人於寃獄而一衿未得長途頓促
遺二孤悉仗晴峯究無以釋鶴原之痛也丁酉選
貢余世本五雲爲之銘

處士

明

易孟景世居邑東北明月橋因自號月橋居士敦行
孝友鄉黨稱信義通經史喜吟咏後徙居縣南流
塘時往來嘯傲於月橋京都士大夫與其子舒誥
檢討同在史館者知其性行好尚之賢相與賦月
橋詩以美之雲陽李東陽爲撰月橋詩序見通志
賀繼明世居邑東鄉之南溟善琴工韻語好誦古書
而浚於名利植品最高同時邑人羅解元二峯以
經明行修爲人師亦雅重其爲人易檢討舒誥撰

有南園逸趣說見藝文

譚曉字魁周家貧績學戢志各場郡守黃聘爲長郡書院山長不就給事中泰和胡堯時以直言謫攸三箠結爲詩友一時利病皆曉力請於胡公鳴諸當事裨補良多邑人頌之

陳伯字元英自號龍泉居士貌魁梧性敏察正德戊辰由增廣生入太學在太學數年以祖母文年邁南歸至武昌聞訃服闋後遂不復圖仕進事孀母洪孝謹益篤至親友有急力所能濟應之不少後士林咸重之

陳宗沛字漁山總角遊泮博誦洽聞七試三薦不以得失介意自少留心六書喜摹古印章平生不藏人善一節亦游揚之有友爲人構訟幾中法傾貲救之得無恙其尙義類如此

皇清

文必捷字紫菴增生爲文遒峻以短兵制勝而緩於名家有別業清池淪漪羅以竹樹中構一亭亭四面牕皆布席砌書各尺許率子弟分獵牕順陰陽開閣魚隨響彈指卽集日東西移陰歸正午魚繚繞出入嚙階下魁者繫絲其鬣被以微笈遊輒知

所在又有朱鱗澄涵晶徹客至陳魚而觀較甚淨
白白號魚樂處士平居言孝言慈以質行爲鄉里
先魚樂蓋其寄興云

賀昇平字奠邦號鴻磐安貧嗜古以正直化導族黨
偕妻瞿氏孝養二親喪哀祭敬兼精研靈素活人
甚衆劉南村贈聯云困而好學貧不要錢年八十
餘卒著有操心要規邑令張竹泉序行之又著殯
葬輯要脉要圖注等書子盛稟廩生孫際疇附生
陳富禧字子安生平慈儉公恕一鄉稱爲善人嘗曰
真心以葆真身心身之主身子孫之主究以慈儉

公恕爲主四者放之無窮况家乎每歲出困倉所
餘以應鄉甲之不給者不能償則概置之行之數
十年不渝子開元開陪國學生以長孫世棟贈武
畧尉

皮獻捷字克三少負雋才博學能文惟以吟咏自適
不樂仕進嚴課三孫長桐耀廩生次榛耀增生三
枚耀監生俱有文名生平言笑不苟燕居必整衣
冠里有疫捷所至之家病者輒痊人咸謂邪不勝
正云

歐陽命申號宜齋幼穎慧讀書觸目成誦十歲卽能

屬文性恬退寡言笑祖以上多登仕籍命申獨沒於進取隱東鄉之昭村灌園莚花蕭然自放年九十餘猶手一編蠅頭細字校閱無訛長子早逝次榮泗榮洵以俊秀入太學孫夢龍登賢書

皮承龍素行端方中年主戶事守正不阿俗爲還淳壽八十二櫻疾時族有以祖塋吉壤可附爲言者龍曰是處青山可埋骨吾何敢戕祖其宅心如此單庭綬性樸厚少與弟同習舉業旋棄去徜徉山水一卷自攜題所居曰乾坤一草亭課子煜訓孫家塾均入大學

夏茂觀字繡菴父增生尙喬課子最嚴同懷舅弟覓雲炎先後遊泮食餼觀獨不列舉場遂精岐黃診脉決休咎百不失一貧者助之壯歲鰥居不再偶壽八十有五新正謂其子曰四序成功者退吾僅以醫濟人來月念日亦告退矣至期沐浴冠而子一清國學生孫曾繁衍皆有聲序序

王學易字靈占少從父由城西遷居珊塘迺父卒事母孝養彌篤母樂推解必順志以成之晚歲家益饒焚券免逋里黨稱之課子名熙名照以義方著均列成均

吳先譽字與言國學生少承庭訓與諸兄奮志芸窓
長益砥礪敦行自飭父增生宏深壽九十五兄孝
廉先舉壽八十七謚生震東壽七十七七譽壽九十
七一門耆壽藹然大和譽以醇謹爲後進式鄉里
稱之子三燦之廩生炳之職員

龍思成字石圃國學生留心詞翰好購書籍娛情山
水兼通青鳥之術自號大可山人嘗倩畫師寫照
手披周易二童抱琴烹茗綴以詩云儼然人在畫
圖中不同處是主人翁

陳璵字雅奏少精舉業晚盡焚棄臨摹古帖善擘窠

大字所書忠孝廉節字徑二尺許深得古人遺意
又善鐵筆所鐫印章流傳寶貴性耽七絃琴設古
劍法醉後激昂起舞顧盼自如家素豐因兄均往
來京華遂漸窘兄卒撫二姪如子年五十餘偶不
豫召長姪錫東命張琴撫漁樵問答一闋滿引數
觥瞑目而逝

歐陽世錦字闇然號醉霞耽吟咏工小楷與邑名宿
余麓泉劉南村友善嘗有句云道義垂規勸薰陶
見性情其行誼槩可想見壽七十四

夏正長字德生善攝生不以客氣佐喜怒合於老氏

守雌之青年逾八旬壯容不衰生平行善於閭賴其庇者每不及知邑令天台陳南陔頽其居曰葆真衍慶子茂桃廩生茂桂諸生孫曾乘盛錫圭家瓚家振之翔之仁相繼遊泮食餼貢成均

朱永湘字晚祥少績學不樂進取以林泉自適建祠修譜既成餘事委之子弟宅右構精舍社門涉獵載籍課子讀書優游終老子四名偉監生

朱名守生而穎異孝友性成業岐黃求醫者不索其謝無力者給以藥餌或解囊以助又嘗售產以濟人急迄至屢空嘯吟自適無少怨尤

夏詢盛字五雋少穎異能文屢試前茅不售其舅父監生謝實潤乏嗣竒其才欲子之病革時授以金數百詢不取商其族爲立後以金置產今詢孫枝繁衍衣冠不替僉謂厚德之報

陳履中字心傳國學生性敦厚持身不苟爲善不近名世居城西詩禮相承能恪守家訓爲端人尤篤於倫紀同堂昆季友愛如一子五之翰之幹之柄之典俱國學生

陳祖和字名世監生隆師道敦友誼屢試未售絕意進取闢家塾訓子以蒔花吟詩爲樂助修里中橋

梁並義渡卒之日鄉黨悼之

李蕙鉅性質樸廉讓爲鄉里矜式嘗曰靡矜於高莫耻於下魏儒之言可用書紳年臻耄耄無疾而終洪麟書字秋躍國學生屢赴棘闈不售絕意名場徜徉山水寄情吟咏尤篤古誼里黨咸欽壽至八十字開漳增生開澍監生

劉子理字似山性恬澹涉書史作文有異致因父母年邁遂無意舉場嘗與二三知己流連觴咏有脩然物外之意

張運模家貧力學教授里黨制藝示仰先民於何義門家塾諸選本極有體認而外間知之者少其設教先行後文於朱子小學講貫尤密亦端士也子鼎甲晚以縣試冠軍入泮授國子監學正

單彰教字國球嗜學敦行樂善不倦課子廷棟暨諸孫俱成名壽八十六 賜冠帶榮身

胡文開號修齋性恬靜祖仲陶任灌陽令積書盈屋文開朝夕披覽能得緒理闢圃蒔花左圖右史將有終焉之志人勸之就試莞然曰天爵自可貴人爵何榮哉俯仰自如蕭然終老

彭頌德字永念事親孝友于兄弟延師課子性耽山

水于策徽名列銓曹學師張贈以熙朝人瑞之額
鄧世椿幼失怙奉養寡母使其弟力學以承先業世
椿敦崇家政闢書塾蒔名花日與儒雅酬酢家稍
裕以產均分弟姪子祖琉職員

余沆字楚三性慈祥樂行善事有父風遇貧乏輒周
濟之戚某以无妄被牽出重貲爲營救常闢草堂
讀易其中尤喜吟咏年七十一卒

文德楫字濟川少稟庭訓攻舉子業父性嚴試不利
輒杖責之德楫順受無忤後學成以教授著名尤
重敦行嘗錄前賢格言目存心省至今孫曾書香
不替

余淑字協中性質直不事雕琢居城市足不入公門
惟以讀書作人訓課子弟有勸入仕籍者以親在
不敢遠離辭

吳定錫字晉三績學能文屢困童試遂不履場屋放
志林泉敦崇廉讓乾隆己酉大饑出廩粟百餘石
以賑族隣晚子業醫戒勿受謝孫曾俱有聲庠序
丁永經國學生質直尙義族黨爭訟多方排解嘗出
己貲周卹貧乏邑令行贈以一鄉善士之額

夏維太字宏聲節婦劉遺腹子也幼承母訓工文詞

應郡縣試屢拔前茅篤志力行有勸其入贅爲國
子生者曰吾一衿不青何以慰母氏於地下以布
衣終

焦爾卓字廷選少承節母歐氏訓維謹力學端品以
束修奉養置產與弟均分輯家乘修祖塋尤竭力
性耽吟咏年八十餘 優游林下著有拙齋

小草

夏喜善質穎性謹口不臧否人物惟繩檢自飭嘗仿
朱墨銘以程功過士論推之子尙裔孫霓雲爰俱
有聲庠序

陳兆任少承家學不利舉場築別業東郊輯古人規
言矩行自勉勉人人咸敬之子其暄諸生其瑞能
宏先緒瑞子宏旭廩生訓諸生

徐邦麟字峻孚庠生事母至孝存歿盡禮修宗祠輯
族譜任勞不怠但修橫嶺潭路生平不樂進取家
居著述自娛有嚴娛堂詩集子四肇芳監生

歐陽一聞幼穎悟力行嗜學隱居衡泌潔已自好及
歿屬妻劉氏善事姑姑喪明舐之目復明子傑孫
光海拜欽俱有聲庠序

賀治信字含孚自少馴謹善文藝克敦孝弟生平仗

義輕財捐金全枕修橋又其餘事子宗貴宗員俱
職員

陳先策字九疇監生初叔宏棟乏嗣撫策爲子策事
之如所生器識宏遠臨事不苟辨義利如淄澠惜
早卒妻劉氏年廿六守節代終子職撫孤成立
龍國望字觀光性愛閒適不搜名利擁書千卷嘯咏
自如四方名流雅與推襟送抱其潔已廉隅尤有
神風化

譚水字丹崖性孤介習靜不趨爰其以水爲名寓意
微遠兼善丹青尤工於梅花藏者珍之

董廷恩字渥三庠生卓犖有幹局里黨倚爲干城臨
事能剴斷機宜有爭訟者釋之尤敦族誼於宗祠
家乘竭力經畫具有成效子三宏義國學生

洪開漢字漾東國學生素性敦厚以躬行自飭家訓
綦嚴諄諄於仁讓諸大節里中通脫子弟咸敬愛
之子四文標文柄文椿俱庠生文樞舉人

周祖輝字其吉國學生兩兄早逝婚教諸姪成立捐
柘桑渡東岸碼頭並石路基地年近五十卒妻彭
氏養姑課子將姑膳租六十石給諸姪子增烈三
簿孫會成名者五

周官禮字成書居恒以立品存心自勵試場雖困手不停披課子家珍受知邑令安首拔冠軍遊庠次敬承亦卓立禮年七十三卒

尹時莘性耽泉石敦崇本行里有顏姓子貧無依爲營婚教待人無機械心羣推長者

毛善鷗敦倫睦族建祠捐租二十石解釋里黨紛爭募化闢田義渡助修橋梁以便行旅

劉文彬字望榮倡修七寶禪林助捐鸞山大橋數十餘金秉性樸厚子姓聯翩常以和睦爲訓不染浮

器之習

李光富字德厚國學生遠祖自衡徙攸詩禮相承富益擴先業倡修宗祠修築祖塋以仁厚聯子姓有困必周以正直化鄉閭遇紛卽解僉稱長者子宗森職員宗棠宗櫛俱國學生孫學蓮諸生

劉德妥世居攸西以厚善聞於鄉宅畔有原泉潑洄四時不涸因自號愛泉居士現九十九歲矍鑠不衰日擊孫曾族黨羨之

周正發字鍾湘庠生植品端方授徒里中以砥行爲要其篤於天倫友順尤爲可風子汝諧能守庭訓楊清泰庠生改建宗祠置產修墳創分祠捐祭租輯

家乘教訓姪烈入泮全仰枕施藥救病寫經送各
寺觀于肇甲及孫均列膠庠

蔣伯溯字子常世居攸西生平好急人急喜揚人善
有諾必踐其言一鄉推爲長者年逾八旬猶諄諄
以忠信垂訓里黨今後裔日昌熾云

蔡上擎性不近名年七十五與妻單氏有梁孟風
陳治副字毅英內行克修不樂馳逐惟優游林麓築
樓於宅後繞竹千莖太史陳春江顏之曰義竹樓

劉章嶝字體仁素行敦厚直聲尤著至老不入城市
鄉里稱爲長者以耆壽膺頂帶年七十九歲孫曾
繁衍

增附處士

陳有封字金玉讀書能觀其大志趨元遠不慕榮華
隱逸林泉篤修內行倡建祠宇增置祭租遇有疾
厄者不吝錢穀以調恤之遇有冤抑者不憚直言
以伸理之士林推重族黨咸欽擬之爲鏡面御史
云

陳宏濟性剛直無所回屈里中篤驚者憚之生平樂
善好義嘗誦劉南村先生詩朝朝自檢衣冠未息
息頻尋出入無之句以自警改別號曰省齋與兄
竹環吟咏互答精醫雖昏夜來叩者必往並不受

謝貧者獨助給藥餌子國善文庠

文治光號石山國學生負性高邁幼習舉業兩試不售輟淡志科名專工詩畫研究天文地理精通青鳥術觀山玩水遍歷吳楚祖父均獲吉壤間爲他人擇葬地無俗師逢迎巧取態人以是仰其品至老家居惟課子訓孫年八十三卒身見四代蕃衍子舒欽由郡庠生揀選分縣孫世冕增生

劉聲濤號松坡生穎異攻詩書研究易理童試不售遂捐志功名旁搜諸家工岐黃不受財禮著有醫方駁案尤邃青烏經著有天元五歌艱費未梓年五十餘卒子五自敷文庠

孝友

明

劉玉溫字至和敬事繼母兄玉池病調侍不倦歲饑
出粟賑貧有貸不能償則還其券時奉上報富民
輸粟賑荒卽舉其二子以應或訝之溫曰邑人誰
有裕於吾子者訓家有早納官稅常存天理之戒
巡撫白公表其廬賜冠帶崇祀鄉賢子偉官訓導
陳廷璠字邦器居邑東朝天峯下別號天峯成化癸
卯母宜人彭氏卒廬墓三年有靈芝烏鵲馴虎之
異知縣陳鉞上其事宏治政元應懷材抱德聘入

都時有中貴用事致相見意見當爲汲引璫曰吾固不以組綬易邱園承歡之樂遂以父老乞養工書翰耽吟咏督學薛公贈句云蜀錦濯紅秋水淨隋珠照白夜隰明茶陵尹余公蓋因題其堂曰珠錦著有天峯樵唱崇祀鄉賢

蔡國璇字雙橋事孀母以孝聞邑令表以孝隱名芳之額明末兵燹堂宇就圯此額獨存

張鈞字廷重廩生家貧力學奉繼母孝廿旨必先進母乃食婚教幼弟身兼父師督學劉起宗有善事繼母友愛無忝之褒後生奉其言行以爲坊表

何津諸生剛介恬退甘貧無求而朝夕奉親侍養惟謹一卷沉吟至老不輟鄉評推重以默齋先生稱之舉鄉飲大賓

譚祖紹增生天性肫摯耿介自持四世同爨邑里重之著有龍池集

王朝訓直方恬素爲雙親扶櫬萬里浮海而歸哀毀襄事善養庶母能以義方訓子壽八十五雲方公陳公謨以壽坊表之

劉應圻號鳳岡登科二十年志端行潔事寡母克孝事仲兄如父雖甚暑衣冠必整爲鄉人解重辟之

寃一錢不受。筮仕舒城。七月而卒。

陳製號人峯。諸生時楚黃耿公定向安城。劉公元卿講學里中。製往師之。性坦易。事嫡母如所生。兄懷以才名見。忌當事。罹禍爲鬻。已產走京師。雪之。懷爲賦詩。有天下交遊誰問我。眼中骨肉汝憐兄之句。懷卒。郡邸無子。爲謹視。含歛扶櫬歸里。叔氏卒。乏嗣。所遺產。惟取其近先塋者。餘悉以歸仲氏。

劉伯茂字君蕃。丹徒令。劉霹第六子。兄弟六人。茂奉孀母同居朝夕。寢膳二十年如一日。母年八十。色養不渝。邑令辛以至孝可則獎之。卒年四十六。

洪吉臣諸生。孝事繼母四十九年。繼母沒。廬墓三年。旋卒。都御史李陳玉旌其墓曰洪孝子。崇祀鄉賢。劉堅號青巖。選貢。未仕。十歲失怙。事嫡母蕭生母。謹孝。卒後朝夕哀奠。歲如常。代叔賠納。逋糧。巡按以孝友懿行。獎之。崇祀鄉賢。

賀金字麗卿廩生。家貧。力學。孝友聞於鄉邦。應貢時。以陪貢。劉某年老。讓之金。需次入南雍。任溆浦教諭。邑令錢贈以人倫師表之額。

劉承協字衷寅。兄弟四人。兄承勛。宦於外。偕弟承祚。承錡。勤學不輟。俱成名。孝養雙親。父壽。官劉文享。

年八十四母賀氏年八十二協亦後壽至八十六
兄弟成名子孫俱列士紳邑侯王旌曰德壽天錫
劉仲昭字予覺歲貢江都縣丞母黃氏病篤祝以身
代水漿不入口三日母獲痊在任勞心撫字每事
必咨母兄諸生仲大鹽大使仲垣繼卒撫兩兄孤
女勝於己出邑令賀納賢鐫其名於旌善亭雍正
丙午崇祀鄉賢

陳所學號達先府庠生耿介自持至性過人父匡一
爲張獻忠兵所執所學不避鋒請代父死賊義而
釋之今子孫俱列士林崇祀鄉賢

文有章字煥宇自少失恃事繼母撫幼弟備極愛敬
入庠後宗理學敦風範博綜古今從遊者衆居恒
甘淡恥干謁周急解紛里黨推其賢族苦丁繁庸
賦章每年槩爲代輸以子昂封文林郎卒贈雲
南左布政崇祀鄉賢

陳治策字漢卿諸生明末從父五魁監軍慈利父以
抗節被執策不忍離側朝夕泣侍至武昌亦被殺
時年三十六崇祀鄉賢

洪闕字敬愚歲貢家貧孝親實行昭著巡按御史温
公以孝幾不問表其閭

皇清

陳恪字敬夫事雙親及兩兄敦愛敬雙親俱壽躋九旬康熙壬戌邑令旌其廬曰孝友可風崇祀鄉賢龍化鱗諸生父病泣禱願減已算以延親年父沒事母出告反面益篤謹不怠尤好義有爲值大兵勦捕吳逆餘黨力請大帥榜諭招徠株連者得免

余家駒字龍友廩生髫年入泮負才名事父母色養不倦康熙十七年簡親王駐攸重其才任以開復衡屬縣令徵書三至以終養老母單氏辭不就母沒廬墓三年兼樂行善事賑飢施藥建橋全枕修

學宮泮池鑄文廟鼎捐貲不吝著有西池雅唱詩胡作傳字昆左號止齋增生父遭亂離家業蕭索臨終囑以置祭田建宗祠修族譜三事作傳旣成家乃次第繼其志撰家訓以示族人族中流亡者數十人悉招徠之仲兄客死扶襯營墓撫三歲孤姪八齡姪女婚嫁給產奩如己出力護長兄於難幾致捐軀生平潛心理學晚悟文王卦變作九圖解著獨秀軒詩文集二十二卷詩入國朝詩的兼工山水大宗伯胡嘗題其畫觀風使李贈以風高南國之額邑令李曾因上憲徵書以其集呈大

司馬彭石源私謚爲文端先生

向天桂字馥之父思蘭遊學江南時值亂離魚沈雁杳消息茫然桂多方尋之至上元縣知父已故撫膺號痛卽於戎馬中扶櫬還里備歷艱辛子以疇歲貢任江西南昌丞先中拔貢任雲南定邊知縣劉洪珠字晉仙州同少孤奉孀母暨祖父母甚謹凡佩悅修滲之屬無不曲體其心康熙戊午將軍穆聞其孝題授廣西岑溪令洪不忍遠宦離膝下不就年七十遇祖先忌日涕泗橫流邑令陳溥爲作孝子傳乾隆三年中丞張題奏旌其門崇祀鄉賢

陳五玉字廷翊州同父達先卒感慕音容圖形定省事之如生主戶政竭力修舉子姓貧難舉火者應其緩急不吝性嗜韻語著有楚風冷清隱齋詩集子治循貢生治行監生俱以詩名

譚文焜字皇英諸生少孤奉母恪謹主族政臨事不欺敬宗收族殫力經營邑西大江病涉倡修義渡置田租以給舟子

陳鴻緒字恢先幼喪父母哀毀如成人叔欽恭撫爲亡子鴻緒養葬如本生繼母劉喪子失明緒舐其目復明壽至耄年居喪三年廬墓壽八十九

賀世昌字偶周父世蓮遠涉他郡昌體父志侍祖父
母不離左右父病痔篤禱北斗祈代尋愈母劉渡
舟失足昌抱母漂流漁舟救之人稱其孝

余佺齡字偓次諸生八歲能文幼失怙每謁母塋悲
號不勝善事繼母朱氏父病草囑婚教幼弟佺矢
志不二課異母弟文德入泮事兄恭讓生平輕財
重義族黨推之

龍起圖字鸞占少承庭訓敦篤力行親易簣時呼進
鯽魚奔市已屬續矣遂不食魚順治間偕里民運
漕沒五百餘斛同人惶遽圖鬻產以償邑令獎之

蔡奇生字正菴諸生以孝行著親沒廬墓一年荒村
素有虎竟避去主戶政合族仰之自服親以上歷
代祖塋悉出己貲用三合土封築豎立碑誌凡全
枕息訟不吝力素性嚴正鄉人稱爲鐵面公著有
亦蠶草文集醉風亭詩集

文士衮字補臣諸生少孤奉母譚氏避亂山中賊焚
其室默禱額天幸存一隅棲母火旋滅母得無恙
兄弟八人晚弟銓係遺腹生產已先析衮以己業
與銓均分館穀所餘贍族黨修宗祠以繼父志

劉士乾字惕若諸生少失怙奉節母謝以孝聞吳逆

之變避兵村落結廬父墓下每聞警負母入山躬採薪水會母病士乾亦病強起進湯藥不懈及母痊方服劑子啟舉人寧河令高廩貢

洪圖河字廷亮諸生母憂病篤圖河偕妻親滌溷穢昏旦伺警欵侍藥餌數易寒暑如一日人稱純孝李柱字旭楚居山陬時賊兵劫其父柱衛父奔避賊追之急以身捍賊遇害邑令吳標題曰李孝子墓洪如棠字思召體素弱讀書深思輒忘寢食遇有道侍立不倦叔父家多故叔母龔乞禱之旅於湘事之惟謹母沒喪畢骨立不支踰月卒時年二十二

譚大桂字菊友明叅政龍誥嫡裔出繼母舅譚光舜家貧業醫以養年五十光妻卒繼娶王氏光姪疾之多方調護王氏自有子夫婦幾不自存桂竭力營護晚歲迎養本生母服勞兩姓人稱其孝

洪際漢字燦先農家子父病噎醫弗能治給漢曰爾自調劑可立愈漢詰之醫曰股肉耳即割股以進遂不復噎後漢年八十餘瘕痕宛然

譚文珏雙親先後卒與弟文璞皆廬墓三年

張士翔幼敏慧弱冠入泮咸以大器期之父年老病癱頽抱持朝夕奉侍弗懈父卒事寡母羅尤謹卧

其榻旁不私寢者七載人稱張孝子康熙三十年
丈田於急公之中條呈利弊懇於上憲聞郡德之
康熙十二年修建文廟及櫺星門任勞尤多

陳治人字道陵由諸生入成均具經濟才少孤依母
值亂負母入山躬耕謀養前都統宜檄入幕以母
喪辭續奉大將軍穆檄從軍題授祁陽教諭治人
每念母身經亂離三牲未逮輒泣下具呈道憲石
轉詳前撫放歸田里廬墓終身其高祖惟順在明
代曾獨力修建學宮治人繼其志礱石柱豎立櫺
星門坊事詳環中山集後都統宜弟撫粵西道經
長郡遣官致祭表其墓曰山高水長

劉祖湖字諦重養母至耄期無缺待子姪恩誼甚渥
文德和字子益諸生繼母賀氏病篤刺血禱神祈以
身代母感異夢而愈祖舉人應揚應撫軍聘修獄
麓志偕和同往應揚失足墮湘江和捨身負祖出
水邑寓賢費思居作秋水吟贈之親沒廬墓三年
塚旁生瑞芝數莖人以爲孝感所致其他睦族敦
倫好善樂施義舉甚多乾隆六年中丞許題旌
建坊崇祀鄉賢子承選進士承曉承軒承恩承青
承麟俱列庠序孫光斗舉人

張可贊字文堅性倜儻有幹局事親以孝聞親沒廬墓盡哀撫愛弟姪甚摯主戶事葺祠纂譜修塋置田不遺餘力生平多義舉修復鳳山書院里中絃誦丕振子光華進士光甲光國同榜舉人

譚宏演國學生事親曲盡色養處昆弟怡順無忤一堂承歡得天倫之樂性恭謹慈祥接之者擬諸公瑾之飲人以醇

劉慧珠字文穎選貢弱冠食餼研究經籍事父令望母單氏繼母蘓氏俱以孝稱撫弟均產睦族修祠皆體親志後任淑浦教諭兼署麻陽捐俸修學宮

課兩邑諸生多成名提學習贈額獎之衰年遠宦每二親生忌日必舉奠盡哀卒於署中永楊

題請建坊

張朝盛父歿哀毀母病八載籲禱身代乾隆元年旌譚世位字晉五國學生事父兄曲盡敬愛邑令蕭以

孝友無閒獎之尤喜周人之急著有霽雲齋集

費承凱字元次監生本姓陳門內雍穆訓子弟惟謹襁褓承外氏而奉養本生父母亦不少缺汲則竭力營塋上及本生祖母皆獨力任之叔父抱病十年侍起居如一日有甘旨輒促家僮趨奉云

夏之鳳字羽皇康熙癸巳舉人鍵戶窮經事親克孝

嘗手錄文昌孝經置座上朝夕諷玩親意所向必曲體之其執親喪也哀戚極致卜塋崇岡路崎嶇護輜車顛墜折肱不藥而愈蓋孝感所致云

劉世埏字鸞占諸生九歲失怙母吳氏矢節相依爲命後兄弟析產擇礫談腴生平謹厚壽逾老年

恩賜冠帶榮身

胡經虞字正書諸生博通羣籍事父爾蒸母侯氏敬愛不渝沒後常懸遺杖真容出告反面如生奉養繼母周氏二十八載存沒盡禮德若修學建亭賑饑全枕見義必爲皆有實行

歐陽再思字孔評號晴川諸生繼叔父增生震亨後克承父志捐田租以供學宮文昌閣油燈之貲復遵母教捐修文廟崇聖祠兩廡及宗祠母常念獄囚饑渴每歲暑送茶寒送粥以成母志處同母繼母諸昆弟無稍忤尤樂善好施病者藥之孤者育之死者殯之縣令許據實通詳藩臬會核有足稱真孝子可爲古善人之語乾隆元年巡撫鍾題請旌表建坊崇祀鄉賢

謝君台字祇先諸生養親不懈長兄君名入泮早逝親傷之甚台由致承順問視尤懇親乃怡然忘老

家不中貲鬻產以贍宗祀族稱其賢

陳爲鴻字漢翔授縣丞幼失恃諸昆隨父粵西官署
鴻侍繼母於家承順不懈內外無間言親沒後全
枕賑饑悉遵父教恤孤慈幼善體母心人稱其孝
劉掄元字露文學博性恬有古君子風父鸞瞻年近
期頤掄先意承志無幾微違司家政萃族之英敏
者躬自督課與己子均族屬欣欣諸子昌漢昌澍
昌潤昌瀆昌瀛昌海皆有文名雍正丙午主司吳
起昆得掄卷擬冠南闈房師邵屢爭不合深爲扼
腕令治裝偕入都就教習出身謝曰老父在不忍
遠離父沒朝夕哭卒於苦次

劉其淑字又荀歲貢父邁目疾幾盲淑每夜泣禱北
斗一夕方拜祝忽流光墜垣晝然照耀父目頓明
淑嘗患肺疾在母側輒恐呻吟患齒痛視母膳必
強飯如常親歿廬墓有烏集梓榮之異乾隆二年
旌表建坊崇祀鄉賢

劉愈麟字天珍至性真醇學品端潔康熙甲子刺血
上書鳴父冤中丞金理獄先期夢一少年擊鷲鳥
墜地及見愈麟貌類夢中人述之臬司一時官吏
咸駭異之父冤得雪

文德新號次玉性孝謹母嬰疾夜惟假寐未嘗安寢
事長兄如父又嘗拾遺金於東渡訪其人還之
劉楚才諸生入監授縣丞母甯氏先沒事繼母廖氏
定省如一遇母疾奉侍彌篤後避亂山莊寇兵至
棄妻孥負母徒涉獲免

周肇盛字廷元父病目卧牀醫不效盛祈禱願減已
算益親壽父目復明年逾六十父母繼亡哀毀不
勝墓後廬墓至睦族修祠捐義穀百石善尤可風
乾隆元年中丞鍾題請旌表建坊

易廷芳字遠山國學生父早逝母病醫辭不治芳嘗
糞以味苦有生機復求醫獲痊遂留心素問之旨
施藥濟急廣行義舉以延母壽諸子名列膠庠

易啟鳳字岐山少治舉業家貧嘆曰人生當親待養
藜藿不充他日祿養不已晚乎遂業賈以備甘旨
父疾鳳呼號仰祝夜夢絳衣人令取司空山溫泉
池水煎藥進之遂痊卒年八十一

曠珏字永錫弱冠時父秉奇當承大差珏請代父以
其穉不許請益堅曰此子職也卒代往備嘗艱辛
既還色養彌篤父所施濟解囊無拂人益賢之

洪際涓諸生幼失怙恪守古禮不苟暈不入內室者

三年侍郎李振裕內翰朱珙均以詩褒之

譚金聲字元音成章嫡孫其祖因國初定賦慮荒額難敷倡長郡十二屬具呈前撫軍志未竟而卒後康熙二十年清丈不敷吳令捏造無圖荒冊抵數逮五十三年高令又捏設里民認墾細冊至五十八年陳令祗丈出八百零頃實缺額三千五百九十零頃又不遵部議下則陞科之例先照原則陞科思以一畝實墾之熟捏抵三畝無圖之荒勉敷全墾額征金聲卽以實墾則無可復虛墾則難再復立結頒丈觸怒道憲楊遂以官民通同欺

隱與前府沈前令蕭陳一同被黜幸蒙寬宥闔邑咸嘉其義舉紹先至於事繼母能順撫孤姪有成內行悉協邑令高表其廬中湘庶常黃中理贈以詩所著有昭山詩草

文生岐字鳳洲監生父諸生震常周急繼絕岐有僕母卒乞歸岐體父意並命携其妻得延嗣續幼緣痘疹目眇勉侍父疾日哭禱身代後父愈而岐左目忽大明人稱其孝

邱元登性渾樸事繼母以順稱課弟元發元癸有方皆克紹醇謹之風登子大正大式同入泮

張璇字廷璣敦行孝友捐租建祠全會姓之枕賑荒
年之饑鄉評交頌之

劉締生監生母病寢處榻側經年不離常體母志周急
每歲青黃不接之時以穀二百碩貸里中不取息
子康作監生孫元周職員亦克濟美

劉鼎奕字子英增生避吳逆兵渡江父墮水奕躍入
水中抱父出流五里登岸後買宅一區於壁中獲
金三百兩名原主與之邑令余以義趨拾遺表之
譚昇霽字芳燕事親先意承志父好施予霽必勉成
之親沒不改志常傾篋仗義後公舉鄉飲大賓邑

令楊詳請 旌表壽九十五子孫多列庠序

劉拱珠字文龍諸生父慮拱獨子體弱復撫姪拭珠
爲子拱體父志盡友愛家素饒產悉均分弟卒撫
育猶子如己出年八十二例賜冠帶

劉世錦字雲先養親致敬居喪盡哀每忌日詣塋拜
掃嚴寒不改弟世錠卒撫孤姪給以田產常拾遺
金還之其人債不能償者置不問壽八十七子照
珠廩生孫傳易監生

歐陽昊字其吉諸生素醇謹宗族稱孝兼好施予全
枕賑饑焚券著彙訓以示子孫刊條約以肅家規

邑令張重其賢延舉鄉賓不赴以子一正貴贈如其官

劉授珠字子由諸生幼嗣叔後事繼母陳如生母後繼母程連育三子授珠因歸本房時本生父母已故田廬係兄弟先行分給置不問以硯田自營鄧邦達字楚元監生季父卒無嗣邦達營葬事餘產盡聽堂兄弟分析絲毫不取族某客死貧無立錫爲迎養其母所遺孤女贈奩嫁之子七長祖授澧州學正餘俱遊庠

陳五政字天蓬生平葆貞自守前令張特舉鄉飲親錫匾額且爲之序曰予蒞攸五載始知邑學生陳兆選之祖諱五政者年登九十有五品行端方身體矍鑠待進期頤於未艾爰舉鄉飲之禮并錫人瑞之額享年九十八歲

張朝聘監生孝事雙親友愛諸弟年五十而卒著有九徵集

尹之溥字亮武養親七十載如一日持戶事嚴而有體年四十乏嗣弟俊先以次子承之後爲三聘姬卒舉男同居四代兄弟怡怡云

劉鼎鉉字節齋庠生鉉之事親也言呐色愉事無擅

行無由已敬奉庭訓不離左右壬子住竹溪遭大
夥行劫身衛老父被賊火傷右臂遂不能操筆口
授二弟與子姪經藝皆登膠序捷秋榜兩事繼母
人無間言四明史殿撰大成有獄遊贈孝行敘并
詩著焚玉集以自傷邑學師廣濟藍應象邑名儒
劉三英叙之

劉自熾幼穎慧善屬文遊庠後益自刻勵以二親年
邁故不敢遠涉重湖遂絕意科舉左右承顏晨昏
彌篤世居城母惡囂改築山莊板輿奉養孺慕終
身有異母弟蕩產殆盡屢分給之且昏教其子孝
友之聲溢於閭里至今子孫猶昌熾未艾云

賀士升字萃上授禮部儒士天性真摯色養雙親無
間執親喪哀毀骨立築廬墓傍遇風雨雷霆伏塋
號泣尤敦友愛廣任卹建祠修墳爲族人倡生平
恬退寡營課子孫俱聲振黌序

艾廷楨字竹如諸生兄弟四人父卒勉諸弟曰男兒
生盛世不得科第頭上巾可負却乎以故先後皆
得列黌序茶陵莫某窶而懦豪暴侵陵聞楨好義
挈妻子依焉豪跡之幾復殆力護乃得脫

譚師穆字繼文明進士子英之裔敦行孝弟以廉隅

訓其子四子諒誠謹誼閭黨稱淳厚不愧家風
謝廷斌字二兼幼失父家貧力學恪奉孀母婚教三
弟以硯田所餘置產均分不私爲己有

鄧應選字又將諸生兩弟析居蕩先業選乃以所耕
稻田悉委叔季母既耄憐少子愈篤徃視輒盈篋
以從妻何氏明方伯楚英嫡孫女覘知之候將發
輒令諸媳各縫囊置姑宅左右潛輸諸所需於寢
率以爲常

吳雲會字捷之諸生叔某困甚築室居之叔性善怒
終身無所忤叔母繡佛長齋供饌必謹子昌祖國
學生

胡綬虞字心傳諸生志芳行潔敦宗睦族修家祠造
義渡焚券全枕濟喪不一而足歲貯河都穀數百
石賑貧乏撰先哲格言刊成卷帙垂爲家訓

張朝聘字師尼國學生孝友性成事二兄怡順無間
言伯兄朝聘艱於嗣五旬失偶旋即世遺一子甫
二週聘慷慨與仲兄朝職奉遺孤鳴族告廟立爲
兄後產仍均分昏教如子俾弱冠成名張仲家風
可稱無忝

周廷獻字輔世性質直胞兄無子家多藏生子不育

獻以次子嗣之筦鑰悉歸嫂雖朝夕弗給晏如也
文玉春字二見諸生父歿甫七月比能言問其母兒
父安在母泣曰汝孤兒安得見父便牽衣哀號比
長追寫父容晨夕奉祀遇生忌祭奠悲泣竟日母
老年多病親侍湯藥未嘗稍離昆季友愛肫篤子
承錦承簡承選均遊庠承彩解元承鳳舉人

陳述基字肇績號瀛谷國學生與兄遵弟祥常並承
父燕閑庭訓插架之儲互相討論基友愛肫切弟
祥多男父諭以祥婦方震若復育男當爲撫養之
及姪煥甫生卽遵父命自乳哺至成立入國學析
父所授已產與己子炯均分無二視又姪煒少孤
見其專志向學給田八畝勵之煒後登乾隆癸卯
賢書生平卓犖有爲十上京華交遊南北草書有
名於時某歲自京歸道經肥鄉有邑人爲令幕友
以金寄歸其人旋卒名其弟授之封識宛然子炯
爲名諸生孫啟疇拔貢曾孫錫璋諸生自祺監生
文定國字辟園郡庠生家貧父督課甚嚴兄弟一燈
共讀急望成名慰父心鬻妻奩田爲弟就武試並
遊庠母早卒懇父再娶事繼母終身以孝聞姪自
蔚幼失怙恃定國撫養婚娶專延師懇勸倍其子

姪食餼田產房屋自創悉均分先是二十九歲得
痼疾夢神持簿謂曰爾壽止此當益爾年卽將三
九字互易後果壽至九十三共以爲孝感云子自
炳恩貢授州判

皮啟海監生性孝友母洪氏持齋侍母同食母憂其
體弱擯之乃私具素食如前長兄當室凡事請命
後行兄逝撫孤姪如己出嫂劉氏貞節爲請旌
建坊諸姪皆成名族弟鳳儀家貧捐貲完娶得延
一脉作箴銘以示子姪曰汝慎守之子霽耀俊生

譚大年字萬寧國學生封

昭武郡縣

性溫厚敦崇家政佐

其父封職光珣以積善聞於鄉里與諸弟怡怡至
老晚歲始析公產一門友恭順德可風至其素封
不矜能濟困救急行善不沽名洵長者也子章煒
遊擊章煥守備孫國恩舉人國忠國恕庠生

龍朝恩封職事父母以孝聞倡修宗祠捐祭租十五
石乾隆三十二年捐學租十石凡有建舉悉體先
志人稱濟美子殿選候選衛守備殿陞附貢殿揚
監生孫來泗巡檢來漳現任縣丞起湘來湘來潢
監生

鄧兆舉廩生幼穎異十五食餼親疾必親侍湯藥兄

兆譽病爲文虔禱籲以身代弟兆甲緣事牽誣舉
聞嘔血數升遂以憂悶成疾年未四十將貢而卒
皮琢字星沙十歲能文工書畫童試屢列前茅郡守
以大器期之時值山寇竊發肆焚掠琢抱母柩哀
泣不去驚悸成疾旋卒

陳有瑜字瑾菴少工文不利舉場事父母並祖父母
孝謹不渝存沒盡禮胞弟五人撫育昏教皆獨任
之主戶政公平族遵其訓

鄧朝仰兄弟數人子姓蕃衍食指甚衆朝仰體父志
終身不析爨治家嚴肅子弟皆遵其教以醇謹著
鄧遴緒監生繼母劉氏苦節偕妻陳氏奉養加謹課
子仲容成名歲施丸藥濟人

文承選字青萬諸生好學博通幼失恃事父務得歡
心里有白露陂久廢選承父命竭力修築瘠田成
沃兄弟五人雍睦無間言每聚談達曙皆治家格
言三兄早卒撫諸姪督課甚嚴俾克成名生平持
身端方族黨子弟有不檢者不敢過其間予四長
自典庠生兩冠童試有文名自敏監生

余金齡侍母病數載不懈協和兄弟出私貲以釋爭
端常全枕施藥施綿衣棺木歲歉施粥會客武昌

居停主人舉家疾病代調湯藥旬日盡瘳

皮應寨父早逝力紹父志母病癱口吮之侍湯藥三年不離左右又倡修祠宇捐置祭田壽九十三

歐陽鼎銘字鐫九素嚴正篤孝友父廷燦官通道訓導年七十致仕歸侍養不離膝下父歿餘貲悉讓諸弟母單氏持齋後多病遂代之齋母病獲瘳

劉愈棗家貧事孀母能竭力母病醫藥罔效棗割股肉和藥進之遂痊母年七十餘壽終

文琳字翰登諸生兄弟七人餘皆先逝琳獨養老母兼營兩兄之喪自創新居以舊宅推與諸姪晚授

徒家塾子弟暨甲黨成就甚眾子承職承煥承典監生承瑞貢生孫自翔增生自積監生自翔自翽諸生

鄧林描父憲事祖父母孝謹描事父亦如之父性嚴幾微不敢忤父沒遇忌日必盡哀兄林花遠館他邑代理家務不少欺孝友真摯里黨稱之

劉傳文監生事父三榮以孝聞友愛四弟督課成名合爨三十餘年置產公分掌尸事分毫不苟增置祭田二十餘畝長子楚耀舉人晚子德耀例貢孫曾俱列庠序

陳斯秀字毓圃監生善事父母不離左右與弟怡怡
至老無異少攻舉子業不樂櫛比章句性淡名塲
生平尙義敦倫某戚家落還其券四百餘金子漳
庠生

彭槐祖父好施與父沒繼志不違有佃逋租百餘石
憐其貧置不取乾隆四十六年獨捐社谷百石里
黨頌之壽躋百齡子六孫十八世景恩貢生

羅達性質直躬行孝友子七人白首雍睦內外大小
百有餘人同居五代家事統於所尊子婦躬操井
臼不畜僕婢孫夢樓諸生文耀職員文煒州同

譚際豫父歿母蕭氏病痺與妻龍氏侍疾澣濯不假
僕婢復患噎醫云須乳可痊龍適生女遂乳其姑
兩載漸能粒食姑壽至九十九

朱性温父沒哀毀與弟分產取其瘠母賀氏病呼籲
虔禱久之獲痊昌年六十抱沉疴知不起屬其子
曰善事祖母吾目瞑矣賀氏壽九十九

鄧朝仔兄弟六人仔班居第四同爨數十年老始析
產謂次兄朝儁曰三兄朝任子世樞父子繼亡當
以長兄子嗣五弟朝依亡當以六弟朝企子嗣宗
產均分獨取其瘠餘貲一無所取獨延師訓課子

弟子世傑監生孫思訓庠生

黃常昌諸生事父天相先意承志父九旬昌亦年邁恒言不稱老每侍杖屨怡然盡歡里黨羨之弟常明早卒歲時哀泣以已子嗣其後生平諸事悉體父志睦族濟乏不一而足

鄧先恩職員年十五失怙事母克孝撫育諸弟成立堂弟先標逝護姪如子倡修祠宇祖塋尤爲竭力丁作汝處士丁之瑜少子瑜清貧嗜學杜門督課自甘藜藿養母致敬汝體父志孝敬如之長兄無子事之如父次兄父子相繼沒撫育遺孤尤篤

胡世建家貧筆耕胞弟世延早逝撫三姪成立每歲分束修所餘濟之時或窘迫必多方周卹親沒廬墓三年

龍思煦字熙川少好學屢拔前茅事繼母孝母病侍湯藥二十年如一日置產給弟有王某鬻妻爲全其枕

丁一容字寬宇兄弟三人長兄生七子容生三子晚弟早卒無子家素饒析產時容以兄子多酌十股均分兄七已三至今子孫繁衍

譚祖祺事母劉克孝母病割肉以進遂瘳及沒母柩

在堂鄰遭回祿將及其宅祺抱棺痛哭火頓熄

鄧德鑑將亡產分給弟姪葺祠宇置祭器倡修陂橋
渡路古墳不一蕭某負欠多金焚券不取

陳斯準字周瑞監生三歲失怙生母楊矢志守節準
孝養無違先是大母早逝撫兄虞才爲子準視若
同胞生平好文工書敦本力行倡建會祖三觀分
祠壽八十一長子超拔庠生

廖昌仕性方正友愛兄弟分多潤寡克體親心妻賀
氏亦孝敬翁姑撫姪文瀚成名

歐陽炳字虎文少力學不售援例授職事親無違人
稱其孝兄弟有不贍者推有濟乏

劉升輝字祥旦性敦厚父傳相司鐸桂東委升家居
持家政每歲遠道定省寒暑必再至弱冠郡守拔
置第一爲督學所抑因入成均課子成名年八十
餘神明不衰易簣之夕手書格言以示子孫擲筆
而逝

龍伯蕙封職事親孝養親歿書策杯棬每捧而泣年
屆八旬談及先人軼事猶深孺慕所建造市陂
聞思橋興家橋崇新橋費逾千金皆繼父志以成
善舉

余世桐字琴仙父澤司鐸鄱邑歸里後桐築愛日亭以娛親父沒能給其行誼捐祭田墳田租五十石助修本邑東山書院及省垣賓興坐棚皆不吝多金家遺童婢悉出貲遣嫁子宗焯監生

張善會字盛斯自幼天性過人邑令鄒賞其文以遠到期之乾隆辛未偕弟應試弟抱病篤會念弟無嗣禱於神願以身代弟果愈會歸旋卒族黨悼之劉瓊字允升四歲母易氏見背事繼母黃得其歡心攻苦力學年四十始受知於學使石列諸生世居城北不識長吏清操爲士林所重子茂滋

文承職字彥賓監生父琳爲名諸生先逝母氏曾衰年多病侍養篤謹孫會中爲母所鍾愛者輒迎其意以時應之家不中貲維持至老不懈以故胞弟四人咸敬愛之其他修祖塋築石陂置義渡諸義舉尤竭力云子自翔增生

文承燿字燃明監生少習舉子業以貧故服賈奉養後燿小裕兩弟猶窶甚一未配爲營昏割自創產贍之一患痺代調護者十餘年子三自峻貢生孫舒鼎現任訓導舒安舉人舒寬舒宏庠生

蔡上蒲字搢先鄱縣教諭協中之父蒲爭父璠如克盡

孝養諸弟析居友愛彌摯以讀書作人爲家訓與

妻陳氏年齊大耋長子彥守

其教課子以照爲名諸生孫培華歲貢

周家駿號適菴庠生兄家麟力學不售抱沉疴侍湯藥經年不倦及沒檢訂遺稿藏之課姪步雲入庠張登桂字攀雲少習舉業敦行孝悌撫弟蕩產以田屋讓之邑令行獎以無忝兄友之額晏都明塘竝建茶亭並捐修橋路行旅便之

譚祖榮父年邁病篤扶持不稍離側母患風朝夕躬自保抱六載不倦及沒廬墓盡哀以遺產讓同懷年逾八旬無疾而逝

夏正階字殿立封職七齡失怙恃長而英幹能宏先業以不及承歡爲恨遇忌日輒哀感不自勝事兄如父及兄故僅遺一女擇壻出己貲嫁之以長子茂發繼兄至獨修高橋以便行旅捐分祠租十餘石助昏賑乏義多可風次子瑞州同三茂璠貢生陳世楫字濟中國學生性剛直無世態周旋篤於倫紀仁善爲人所不及知嘗誨子弟曰孝斯仁仁斯讓仁讓不行私利汨之又嘗手錄趙松伍中丞格言爲家訓少失怙奉孀母十餘年存沒盡禮與兄世棟友恭不渝內外親弱者每扶之困者時濟之

不淺課諸子義方暴嚴之麟舉人之瑋諸生之瓚
附貢生之瓚之容之瓚監生孫會繁衍長敬舉人
陳斯舉字班五貢生封同知才具四周孝謹自飭父
侶漁喜臨摹顏柳舉侍杖屨終日無惰容煩劇委
之服勞曲當父歿益擴先業兄秀曠達體其意無
拂閒居每稱述祖父彛訓及鄉先達芳行性溫厚
聲如洪鐘口無疾言邑有公務輸金任勞親族有
隙潛移力解後邑令張輓句云好禮非關富行
仁肇自先蓋不虛也子源附貢文凱庠生文海文

禮監生文澡貢生文漢候選州同文德試用從九
劉傳中字道宗素敦孝友堂弟世珍家貧幼失怙恃
中携養爲置田宅珍無子復擇兄子爲之後再給
以田又佃李某將嫁媳償債卽蠲租全之壽至八
十有五五世一堂子孫多列膠庠

王策字玉咨幼英敏因父繩表數奇賈志益刻勵績
學爲名諸生闢家塾嚴課子弟兼以善言化導鄉
里忿爭每不戢自消輯譜修墳置祭田諸大端皆
克紹父志

丁作淮父歿甫十齡母吳氏病經年浣濯不假僕婢

兄弟析產讓腴取磽捐置祠田修築祖塋十餘處
劉傳瑜字握亭州同雙親違養逢生忌日哀感行路
事兄傳珠友愛怡怡年四十餘卒子萬澍貢生萬
鴻職員

邱大德父病經年奉侍不懈母年邁孝養彌篤兇大

賦沒僅一女擇歸名門弟大觀無子不能自給仍

與合爨終身倡修家乘捐置祭器

子昌煥職員孫兆甲庠生

彭世昇會館衡郡聞父病雪夜奔歸渡江風狂登舟

頓息母病危有余道人診之曰方用人血和丸予

以丹昇刺掌血和以進遂愈後授徒萍鄉歸遇有

鬻媳者不叩姓名給金以全其枕子懷德庠生孫

之瑩庠生

譚嘉恒字白池性恬淡友愛兄弟分產獨取其瘠邑

令賀以清風高節獎之年九十卒

譚繩武庠生孝友性成敦宗睦族建祠置田課子起

畧起男有聲庠序目擊五代壽至八十一

譚國安號平山例授理問廳事親孝愛肫篤偕妻張

溫清不稍懈親意所向必曲體之妻弟家窘助貲

昏娶以綿其宗祀里有鯨獨加意軫恤生平敦崇

家政負荷世業故能博 封典以榮二親

余藻字懷清由庠生 封同知孝友性成下帷攻苦
博涉經史敦崇古道有隱德子三 一列銓曹一貢
成均

丁文蔚字望深性篤孝兄弟四人蔚最少事親能得
歡心嘉慶四年遵例赴 部揀發湖北巡檢未到
任卒於京妻歐陽氏聞訃哀號欲絕比扶櫬歸撐
持門戶延師課子長啟新州同次亦成立

皮獻臺生平篤於天倫母抱病半載歷數醫罔效獻
臺日夜憂思一夕與妻洪氏虔禱竈神願以身代
次晨母有起色遂以漸瘳人皆謂孝感所應云

劉大景字運開號任亭附貢生與兄大昌弟大易友
愛甚篤父沒兄持門戶景感念庭訓益刻志勵學
遂爲名諸生素行端慤不妄交於先世手澤珍若
拱璧晚專力督課五經句讀皆手鈔定本子枝蓮
國學生枝遠附生枝邁枝遜國學生星偉庠生枝
遜職員

劉傳訓字學箴監生四歲失怙幼弟傳訥生止六月
撫督成立侍養母賀氏不遠離淡志名塲闢達軒
書屋延師課子萬納萬星倡修丹陵橋關帝祠各
處茶亭

劉大琳字錫義二親早逝依祖母陳孝養肫篤嘉慶
初年簽發試用從九琳以祖母年高不忍離祖母
沒哀毀成疾亦卒妻洪氏殯塋俱盡禮茹荼育孤
督課成立子枝繡枝紅均國學生

劉傳命字秀章父母逝事繼母孝養不衰兩兄繼沒
撫育諸幼姪成立增置田產均分無二家訓殷嚴
課子鴻輝鵬輝俱入泮孫增德貢生

雷盛雅字以南國學生孝事雙親色養無缺友愛同
懷一庭融洩卒之日猶以存心養性勗子妻夏氏
育子督課苦守孀帷子鳴亮廩生

鄧世待監生攻舉業屢赴棘闈不挫其志倡建宗祠
捐置祭田里有爭訟力爲排解闢家塾植花卉與
賓朋觴咏其中課子孫俱成名

歐陽特字洪名少力學敦內行兄沒遺孤四撫育過
於所生以筆耕餘貲置產公分經理祠務增置祭
田壽七十七無疾而終

皮殿修號以安九歲時母洪病癱修以口吮之數日
而痊洪事姑謹姑病月餘躬奉湯藥修亦隨侍左
右積學未售有詩文藏於家

雷盛烈字承軒監生父成鳳早卒孀母文氏督課成

立朝夕奉養惟謹允精岐黃施藥活人其衆

譚有驥字朝選庠生率妻劉奉孀母尹甘旨必備歲授徒館穀量給諸兄弟析產推肥取瘠毫無爭競子慤亦績學砥行屢拔前茅倡修家塾凡肄業者給膏火

王廷倫字叙五國學生六齡失恃孝事繼母友愛兩弟主持戶政倡輯家乘修諸祖塋鄉里有急周之有爭釋之生平不喜浮華惟以詩書嚴課家塾至先哲敬惜字紙一條奉行尤力邑令馮以存與堂額贈之蓋不虛也子之賓之寵之寅之宸孫珍廉

珍典贊珍輿先後列庠序食餼貢成均餘多能文王廷侯字師翰國學生少有文名因困童試援例入成均屢應鄉闈性孝謹事兩繼母人無間言與兩弟怡怡至老晚歲杜門訓課義方不懈子之楷職員之相之校之棟之桂俱業儒

譚仕澍九歲失怙事母吳氏克孝母病癱侍疾九載未嘗少離母沒哀毀逾常人稱其純

廖文楷天性篤孝嘉慶戊午母游氏口忽生肉痣疼痛難忍諸醫束手楷禱祝願以身代病轉劇乃割左股肉和藥以進遂獲瘳後母壽六十有五

陳大猷職員年十七父歿哀毀盡禮母劉病篤割股和藥以進獲痊乾隆乙卯辰州軍前効力議敘九品職生平孝謹衆著族黨稱之

宋昌朋號雲軒父世祿年七旬病篤朋割左股肉和藥以進父獲痊母劉目疾虔禱於神裝修佛像母目旋愈嘗倡修孔道行旅稱便

文自天性敦樸好善建宗祠置祭產修橋路弟自全乏嗣以堂姪舒質爲繼弟蕩遺業實無依天教育婚配割已產贍之壽八十一卒子舒定舒靜舒亮庠生

曾文國字宗潘事親孝性慷爽弟入蜀國撫其子昏教成立割已產給之長子潞雲次海南能克家有叔七十舉子卽逝海撫育婚娶族黨義之孫上德廩生亦篤厚國臨終囑以纂家乘爲丞德奉命告成並於會垣襄建曾子祠輯通譜咸謂不負祖志云

王冕字綱曜職員性至孝親歿旣葬廬墓三載出告反面如生時自後每歲必居廬數月在家御甘旨輒泣下交手所造橋路時補葺之年六十一值居廬櫻疾不忍歸遂卒於其間

劉高桂字月臣性孝謹晨夕潔甘旨與妻周氏捧盤
區以娛親先意承志無遺闕親歿廬墓數歲每逢
生忌日無不涕泣平居以禮讓型家族間欽慕

補錄

明皮文望父灝官河間守備陣亡望時年甫十一扶
櫬歸里哀感行路事母陳以孝聞友于昆季尤篤

孝友

文 湛字在宗列前志孝友文士喪之孫庠生文公
望次子兄策野以諸生館歷四方湛念親側無人
朝夕未嘗暫離故不應試迨親歿廬墓三年虎豹
遠跡荆棘不生人謂孝感所致子德葵德來德華
皆名噪鬢宮一庭聚順貞能不墜家風云

吳先青字東生封職性方鯁篤於孝友事父竭力承
順色養無違母先沒每值生忌辰必哀泣祭奠終
身不改兄弟三人敦睦至老毫無睚眦捐租十碩
入祠以隆配享他如施棺槨修橋路不吝捐貲又

其餘事子相禮從九職叙禮理問屬

張匡堯字詠陶賦性肫誠篤於內行事父大勲母朱氏色養無違竭力以奉甘旨及歿喪葬盡禮勸建宗祠捐貲不吝於伯叔兄弟敦睦怡怡人無間言年七十七卒子五皆不忘庭訓捐租十石入與賢堂

易發恭字敬中父政湘早卒恭年甫十二事祖文度暨祖母朱氏代盡子職存亡之敬禮無遺闕母余氏亦年逾七旬竭誠孝養先意承志得其歡心宗族鄉黨莫不欽尊年八十三卒子奎壬子武孝廉

孫三文義文彪文藻曾孫廷揚俱例鬢序

劉子和職員孝思純篤宗族鄉里咸嘖嘖稱之性喜周恤窮乏修葺橋路不吝捐金人有爭訟多爲排解年八十四卒子五人俱有父風孫曾輩皆醇謹洵爲積善之報

蔡鍾華號廷魁大學生世居淥田分住龍湖秉性淵懿篤於孝友母張氏年八十有四承歡侍奉愉色婉容生事葬祭始終無忝兄弟八人怡怡至老其他倡建分祠周濟隣里力所能盡無不爲焉子三貽瓊國學貽珠職員貽穀國學孫曾繁衍丕振家

聲

劉昌洪字簡甫少工書翰通經史能文章以兄早卒
遂不應試應例授職家居養親喪盡禮供事寡
嫂服勤恭敬五十九年即妯娌間不聞詬詈晚年
膳田無多猶能舉義學以租百餘石爲族衆倡督
修族譜時族人欲以外牒入者募餼百金峻詞却
之邑先輩陳寅閣曰吾於劉簡甫言行步趨猶想
見先民遺規子六長承兄祧其五子四入邑庠入
又謂其得隆師之報云

文舒培字東垣邑廩生生性孝友而有幹濟才老母
年登大耋獨力奉養昆季皆早逝爲經紀喪葬教
督諸姪采芹食餼者四本族及合邑公事靡不樂
爲贊襄至癸巳年設立賓興公局飲助大小試盤
費尤爲竭力經理身自勸捐督修堂宇慎立規條
置器皿皆不辭勞悴焉年六十餘子世鍾職員
歐陽逢錦號繡谷附貢生英年好學冠府試入泮屢
困棘園事母克孝友愛昆弟至老不衰族中艱嗣
者主承其祧得繼產遺惠不受捐入大祠爲置醮
享每屆荒月放無利穀邑中義舉首先樂輸主持
戶事置祭田興義學長子文臨國學生次澤咸儒

長壽苑國學生

陳寬字舍萬增生幼爲大父庠生鳴玉所鍾愛經史
文章俱手授督課最嚴其卒也寬哀毀骨立廬墓
三年至父增生煥文母賀氏冬溫夏清先意承志
有古孝子風工制藝而屢困棘闈時論惜之其生
平敬宗睦族濟困扶危尤爲里黨所推云子自湘
庠生自淑亦能文

劉垂以秉性肫篤家貧作貿易竭力以養母尹氏孀
居年老嘉慶乙亥夏月患痢醫藥罔效垂夜禱於
神割股肉烹以進母食之即愈股創亦平母復康
健十餘年始卒時邑令楊旌以純孝可風之額
諸名宿各爲詩以贈

龍來潢字澄甫州同職世守忠厚父附貢生殿墜卒
兄貢生來湘亦早逝獨奉母胡氏先意承志溫清
定省朝夕不離左右母年八十餘壽終哀毀盡禮
撫愛孤姪悉心教督析產公平無私年僅四十九
子纘緒監生長齡自敏俱業儒

劉增爵字鶴鳴父有輝官河南寶豐知縣依母陳氏
家居年十二失怙母訓迪甚嚴無少姑貸及長奉
養母氏益加謹順奮志芸禬屢困童試後遂援例

入成均生平賦性渾樸不事華靡同堂昆弟七八
多相暱眎惟爵居晚友愛諸兄獨怡順無忤教子
訓孫惟以讀書作人爲本年七十八卒子宗銳庠
生宗鑑監生孫振緒續緒俱庠生

劉憲昆字玉郎孝親友弟人無間言捐基建祠字纂
修家乘捐祭貲修墓凡宗族公務俱獨任不吝邑
侯張範追贈以孝德流輝之額子宗邦貢生宗江
宗海俱監生孫三之昂之星之經俱職員曾孫十
餘人章煥章徽監生章焜章炳職員

賀錫珽字摺簡國學生涉獵傳史性仁厚敦孝友郎

同堂昆季怡怡如胞惟以讀書作人勉勵子孫足
不履公門撫孤周貧倡修橋路里黨咸欽其他修
家乘置祭產此分內事年四十五卒子三長龍躍
龍燿晚攀龍監生孫獲容庠生

陳登泰孝弟力田兄弟三泰居季折產擇磽讓腴生
平謹厚嘉慶元年壽八十有二奉 撫憲姜題請
恩賜八品頂戴榮身壽至九十六身見七代洵稱
人瑞

陳嘉賢字錫慶州同職性孝友而局量恢宏主戶事
倡建宗祠捐金六百餘又捐田百餘畝值價二千

金設家塾教育一族子弟他如橋梁道路捐貲修葺邑中公舉及賓興局田租均樂輸無少吝子能樛能權從九能燦都司晚能焜業儒

羅篤光號美堂國學生幼失怙孝養萱帟友恭厥兄篤毅亦早逝撫二姪如己出延師督課甚嚴俾克成名長慎璫授職員次兆魁入邑庠至其重建宗祠積置祭租數百石倡修石龍庵捐田叁畝供佛歲歛出穀貸借族隣不取息其生平好善樂施類如是不僅內行純備而已子四兆瓚庠生餘皆業儒

蕭德慎字訪徽孝友篤誠素敦古處惟以讀書作人爲家訓由俊秀揀充衍聖公詩禮堂啓事官未及補缺以壽終年八十一子方蘭優廩生孫二長世揖入文庠

陳治鳳號樸齋誥贈武略騎尉賦性耿直然孝事雙親又能委曲承順凡本境修葺橋路以及族黨忿爭一承父命無不謹遵捐貲不吝重金排解力爲周卹他若捐置祭租倡建宗祠屬其子兆最兆昂竭力舉行雖費二仟金亦皆鳳遺教也

陳啟新字義上監生素行淳樸宅心仁厚事父母先

意承志極其誠敬事兄友恭甚篤析產能讓撫愛孤姪懇摯爲祖捐祭田修本支墳塋和睦宗族其他義舉尤多年七十四卒子自華自敦孫星璋星瓚俱監生星璋庠生餘皆能文

劉光輝字開元好義行善不干榮進事父母人稱其孝建宗祠修譜牒經理戶事皆矢公矢慎增置祭田祭器捐租爲掃墳費刊墓碑百餘建父母享堂里黨有急竭力攸助見義舉尤樂輸焉邑廣文陳錫東慕其懿行爲之傳以載家乘子宏澤監生宏章從九孫中維監生

賀泰綬字若菴邑文庠天性肫摯耿介自持孝事父母親沒水漿不入于口哀痛逾常小祥內朝夕諷地藏經甚虔哭泣不輟自習青烏書求安兩親復慮未精其理塋後輟自泣禱其生平友愛之真如此長兄父子早逝撫遺孤成立爲娶妻以綿宗祧家雖貧替理祠務增租至數百石悉虛己奉公毫無染指族戚有爭端則力爲排解不避嫌怨沒之日遐邇皆泣涕

劉家駒字致千幼穎慧迥異凡兒大父甚器之故有是名及長工詩文屢困童試擬入南雍爭勝棘闈

後以雙白垂暮家無次丁侍養不忍少離疾則嘗
藥焚香告天歿則盡哀親尋墓地雖當老邁每逢
生忌辰必拜跪奉奠猶不禁涕泗橫流其孝如此
使有兄弟友于可知卒年八十二親見七代五世
同堂子孫多列巖序已載入祥異門

艾芳華字展臣監生幼孤孀母蔡氏督課甚嚴芳亦
奉養彌篤克盡歡心道光辛卯請旌列入節婦
總坊同懷四人芳最少友于無間三兄相繼早逝
無嗣芳一身仔肩塋祭盡禮次兄僅遺腹一子撫
教成立主持戶事經費不數售私業以墊用至於

倡修泰靈橋科甲礪萬金礪及修道路尤不吝多
金生平孝友成性慷慨仗義衆所欽服子四長國
植次國桂職員次國楫國楠俱儒業

廖盛光字桓圭大學生賦質英敏力攻詩文生平慎
言語黜浮華孝順父母友愛兄弟舉凡建祠宇修
礪路總理戶事無不克承父志至老課子訓孫一
堂聚順子六長啓發庠生四啓運庠生餘業儒孫
文元庠生餘曾孫均業儒

廖尚勇字義士性強毅好善樂施教子訓孫皆賢達
有幹濟子志道已入義行即其次孫庠生盛典更
能上繩祖武總理戶事倡建祠宇增捐祭田倡修
宗譜費用數百金至於重修青陽觀黃龍寺獨修
石路數百丈及發米賑荒尤慷慨不吝邑侯楊曾
賜以篤義承先之額

義行

明

正統

何志高

彭羅陽

毛溫鑑

文凌霄

陳善輕

譚處善

以上俱納穀壹千貳百五十石賑濟勅書旌表

景泰

張泰春

彭雷震

洪忠可

王槐寬

王翰

陳壽卿

以上俱納穀壹千壹十五石賑濟勅書旌表

天順

王翼

謝子龍

蕭振

以上俱納穀壹千石例賜冠帶榮身

張廷春

蕭璉

何箎

賀紹祖

以上俱納米四百石例賜散官

王冲霄

蔡瑞

以上俱納穀四百石例賜冠帶榮身

成化

蔡懋

陳廷璽

何旺

蔡惠

以上俱納穀陸百五十石例賜冠帶榮身

周鳳臯

皮日昌

鄧廣

劉春林

蔡純

以上俱納穀五百石例賜冠帶榮身

陳銛

洪興賢

洪田

蔡國儀

蔡組

洪厚

洪祥

洪模

以上俱納米百石例賜冠帶榮身

蕭孜

蕭俊

陳富

陳宗載

彭珍

劉南箕

丁璉

王寶

王萬化

陳鵬

文炳

蔡經

王日詔

王萬寶

王宦

王薦用

以上俱納銀五十兩例賜冠帶榮身

劉仁錄

陽壽昌

歐陽時文

陳友文

董璠

周處倫

武廷漢

丁志淵

鄧鵬

譚凱

王裕

龔胥千

易忠則

李子韶

龍圖

蔡國賓

蔡國仲

龍章

龍惠

陳儲

譚廷儼

以上俱納穀叁百石例賜冠帶榮身

嘉靖

張楚瑤輸粟叁百石例賜冠帶榮身

劉腕邑廩生慷慨好義喜施與負才畧嘉靖間九廟

工興遴幹材運漆赴京腕身任其事詣部交納以

議叙授學博

洪言字簡軒官會昌主簿性剛直修祠葺譜敦陸宗

族乙巳歲大饑人皆閉糶言計口粟以贍一鄉復捐金以賑族之貧者築春塘陂惠貽一方及卒鄒文莊公作像讚復銘其墓見府志

劉通達字皮亭三舉鄉賓建城岡觀捐數百金里中橋梁獨力修築里人因以其字名其橋爲皮亭橋劉朝奎字象山天啟七年運漕舟碩解赴岳州舟沉於湖奎售產墊賠邑令王嘉其義以急公良民額表其廬

張賓王字大觀廩生明末學師白文明被害於寇賓冒刃收其骸葬之巨田復迎師母葛氏供膳三年卒爲之合葬且爲豎碑今子孫仍紹先志春秋祭奠于其墓云

劉化廩生剛方不羣自守益堅至今人服蔡國祚增生仗義特立自守攸人至今道之

彭官業醫志在活人訓子若孫遊邑庠者五次第俱有成就年七十餘舉入鄉飲

張尙鎮字崗山善書懷素以好義著

洪祥孝友溫讓以輸粟爲義官歲飢賑貧不計償鄉人嘆服士大夫以清隱推之大司成鄒文莊公

爲之贊其像

劉起元字乾德秉性慷慨周危濟急常爲鄉鄰解羅網之寃與里役除浮派之苦雖費資千金毫無德色致一堂五世羅列縉紳人以爲厚德發祥云

劉三鴻字日三增生性孝友慈祥有古善人風明末賦役日重兼值歲稔見窮民遭賦難償捐貲代輸二百餘金衆皆以手加額頌爲長者舉鄉飲賓子天錫訓俱邑庠今孫曾有獲雋者

謝大宙字懷山萬歷戊戌歲薦力敦古誼置義田以贍族修祠譜以敦本督學王獎以義追蘇范之額

洪如樞字文撓父早殞事其母至孝叔際瀚無嗣樞事之如父瀚亦視之如子並忘其爲姪也家貧筆耕爲業見人之急卽以所餘之束修給之路拾遺金數十兩訪失者完之無德色時人服其慷慨

張希宗字貴峯居恒以忠厚宅躬家非素封而好施不倦歲甲子大饑輸粟贍族里待以舉火者百餘家嘗贖徐人之子完其婚築鴻橋陂以灌田里中胥沾溉焉

陳幼學字行之邑廩生同產四人兩兄一弟皆樂仕進幼學獨抗志一編常呼金帛爲大同使譬諸轆

輜滿則死耳故世業豐裕晚歲匱乏矣太守堵手
諭鄉飲八舉七不就雍正初 詔贈義士崇祀忠
義祠

洪際勳邑庠生性好施主家政四十年事無大小悉
力排解甚則傾囊以濟之族有犯其祖塋者勳獨
慷慨鳴公有以鳩費之說進者勳笑焉曰力可爲
則爲之第求祖靈之寧斯已矣人咸高之

洪際奎年十八補弟子員慷慨任俠是時僞賊尙熾
堂叔以罵賊身死屍遺茶陵奎攜僕二人觸矢冒
刃夜半入賊寨中私取叔骸負之以歸僞弁未知

之也江西永新郡有朱姓者以獲罪於邑令而死
令怒未已欲并戮其家朱人妾李氏抱其遺孤甫
三歲暮夜投奔奎深匿之於是朱姓之後始存

張希寵萬歷十四年大饑出粟二百石賑濟一時貧
民全活甚衆已令賀造廬握其手曰賢勞哉拯民
饑亦分吾憂也隨贈以義重閭里之額

歐陽壽昌號清涇樂善好施成化年間捐粟三百石
賑饑恩賜正八品冠帶榮身建坊湖溪子鎮歲貢
任河南湯陰縣訓導

蔡承賚號傳巖有才子宏博四中副榜萬歷甲午分考

得其試卷爭參解主考欲置第二不從期以來元
冠一榜應萬歷乙巳歲貢選浙江台州通判平生
澹靜不樂仕進肅然古處而好週人之急歲稔施
粥天寒施絮每一出無利穀千石活人甚衆於宅
西建有隨緣橋一上建置一亭以爲賑饑寒之處
劉仲明字襟虛邑一生嗜義好施歲歉出谷賑濟邑
令賜以匾

皇清

易泰來字吉臣邑一生積學敦行康熙二十八年膺

鄉飲介賓邑令吳公敦請啟云誦詩讀書不愧儒
林雅望入孝出弟兄爲士林羣欽行誼特著攸輿
衣冠爰衍後裔

洪際盛字躬逢邑庠生嚴毅持已遇事不趨利避害
族中子姪貧不能支者爲之婚嫁進士洪紫雲公
任粵東道時捐太平宴金置祭器四副一在長沙
府學一在家廟離亂燬躬逢多方搜采兩處簞簞
復全旌表義士入忠義祠

陳去華字文簡大中丞韓開撫湖南招集才能召華
爲從事安集閩粵黔蜀等處苗民有力焉惟好博

濟邑有丹陵橋大埠橋皆捐貲建成歲饑出谷千石以貸不取其利不能償者焚其券衡山文選司郎中譚尙箴爲立傳

涂士景字異公邑庠生秉性好義施棺施粥施絮全枕修義渡橋梁所費計數百餘金課子贊中癸卯恩科次質貢生屢舉優行孫國學生大禮大本皆不負書香云

劉成邦字永命邑諸生時有黃弁捕流民三人誣以爲盜執之就戮臨刑時邦冒死白其冤三命得全蔡伯祥字異生歲貢生生平重然諾排難解紛鄉黨多質成焉學宮戟門頽圯捐貲倡修蔡氏宗祠勒碑著其卹孤賑寡孝友之蹟

劉伯朋號正宇由附監授同知學宮戟門鑄鼎悉捐資助修家廟重建爲族人倡生平恂悞端謹里黨咸推

洪際揚字伯抑儒士遇歲凶出粟以賑饑本支子姓喪不能斂者備棺以葬周急濟危爲人所難

劉承錡號景卿邑庠生性端方才識遠到順治九年夫役雜派浮於正供斃獄者百餘人邑令掣肘錡鳴之當道革除站夫勒有石碑里民始甦

胡良芳號桂生性正直敦孝友修宗祠仗義好施鄉人陳少宇遺餉金二十金夫妻憂憤欲投繯芳拾得詢至其家以原銀完陳全活兩命通詳公舉鄉飲大賔邑令張贈額承天寵嘉

陳治安字誼後邑庠生慷慨剛介順治七年條陳通邑利害鄉人德之

譚成章邑庠生剛方正直條陳通邑利弊奉 巡撫周給示曉諭至今人皆頌之

謝 綉順治初舉儀邑令于轉詳分巡道傅回批云謝綉爲善於鄉足以風世仰縣給匾旌其廬日月

且推賢

陳一麟字祥之秉性端方力行善事給棺施綿數計盈千捐金以助婚全枕毫無德色設義倉於鄉每歲出無利穀千石時康熙丙辰丁巳大荒設粥通衢活人甚衆遊庠公舉鄉飲大賔邑令余三奇贈匾以表其宅及沒通都感泣至今猶思慕焉

劉起先字蘭生邑諸生家貧力學慷慨尚義康熙庚申歲飢有劉月評通人田租將鬻妻以償其妻慟哭溺水適起先負笈遠歸途遇救援當罄館金與之俾其團圞起先自守窮約恬如也

歐陽一璘邑諸生早歲貧窶衣鶉食粗恬如也後頗裕遇人窘急及邑中公事費百金不靳中丞潘獎爲樂善賢士

張 昱邑諸生善事繼母甘旨不缺撫孤姪女嫁奩百金田租百石俱出已財捐修族譜立絕祀修吳楚通衢四十里賑族里饑荒粟二百石義聞甚著洪際藩字維翰族叔昌臣遭疫疾莫敢省視藩親爲調治殯葬如其禮康熙丁酉江西堪輿陳樹祥遭疾疫主人恚弗視也藩昇入其家治弗效亦殯葬如其禮遺使不其子於江西鄰人迂之藩嘆曰行其心之所安耳

劉光諫字信先幼孤家貧孝事孀母徐氏泊壯稍贏邑文明下塔圯捐多金重修常置祭田出賑粟居家文史自娛以澄心名其堂訓兒孫曰爲善最樂一語終身受用不盡

蔡來煥字采章邑庠生志潔行芳主祠事二十餘年玉潔冰清族紳士咸旌以嘉言捐貲修歷代墳全枕隱德可風至其排難質紛鄉閭小事咸化順不至煩縣使君右魯仲連王彥方遺風子五益如境

遵其遺教

譚聖標邑庠生好義樂施嘗置婢得李氏媳詢知卽呈諸當事歸之陳鼎先之子家貧目盲欲嫁其婦標聞卽捐金十兩資之學星卜又族人負其債百餘金將鬻子以償呼之至焚其券

蔡 莊字南林孝友正直無產業嘗資館穀以行義如救荒全枕周急焚券雖簞瓢屢空晏如也力學攻苦一題數藝立就數奇未售賁志以沒輿論惜之

劉祚蕃字慶錫貢生好善樂施蔡周忠烈祠廢蕃獨捐建祠并兩旁舖房賃租爲春秋祭需 上憲獎以義風維世捐金梓邑人遺詩名曰攸詩拾殘又與祖叔傳鼎同捐西城內舖房四間建造育嬰堂上憲有義風保赤匾獎其廬

賀世望少入邑庠髦尤好學壯年鰥居義不再娶生平修祠輯譜造梁濟急善行不一事今孫子均列膠庠乃積善餘慶也

劉宗顯邑庠生性尙義家無儲積見祖祠傾頽卽鬻
已產以重新毫不問及族人里有洋湖灣石橋崩
圯宗顯不惜重金傾囊獨築其他蠲積逋以甦窮
困減常膳以周孤寡邑令高獎以儒林碩德匾額
張 珩字形上性友愛兄死撫孤竭力昏教逾於已
出又子姓中貧不能爨乃慨然曰饑餓當與人同
患况一本乎遂發廩以與他如捐貲輯祠一以敦
睦爲念至今族黨傳頌

周培國字卜又授州同慷慨好施康熙乙酉村疫流
行培亟請良醫沿門診治兼資藥餌貧者賴以甦
主戶事周恤族人排難解紛推爲鄉祭酒子忠君
國學生趨義樂善克承父志蓋後先濟美云

譚景華性任俠族人譚某不能葬父經紀其喪里中
楊某等負急欲售其妻輒代償令其團聚子庠生
明裕承其志而廣之嘗延塾師教其鄉里子弟之
秀者至今口碑不絕孫國學生見龍繼述前徽一
經不墜

劉 誥字上客庠生樂善好施康熙壬子江漲大水
誥見一婦携手抱樹而來急出貲募漁艇救甦歲
饑盡焚佃券不責償鄉人德之

蔡來裕字燕皇邑庠生好義樂施里有鬻妻溺女者
隱周力拯無德色其焚券免逋貸不一事子國學
生上瓚上瑄遵繼遺志鄉人稱之

劉傳樾字斗南附貢生喜善義事雍正丁未戊申間
歲大侵出無利穀二百石與貧者多不責償聞人
有急難竭力排解不使其終厄他若修祠輯譜必
捐資督理無稍倦妻周氏捐田租一十二石入普
濟堂以養災獨邑令深獎其事

周宏漢字文燦本姓羅設弧承舅氏比長力請繼父
再娶扶持三弟如同母弟迎養必竭其力當事特
重之家貲稍裕施予無倦客年八十餘尙總鰓解
推云

李聖潔字如圭早失怙承事孀母謝惟謹撫諸幼弟
教養婚娶皆一身仔肩年弱冠娶劉氏生子鳳來
甫期年旋喪其偶遂終身不娶課子遊泮以光先
業

周世昌字西侯庠生丰姿俊雅事父卞又母朱氏以
得其歡心性喜解推同社中有困乏者貲以膏火
無稍吝每歲田租貧不能償者雖豐年亦減之至

枉輿道路靡不捐貲修治未及三旬而卒刑部員外周絳侯先生爲之傳

余遐齡字祝三邑庠生秉性剛方待人公恕兄弟二人獨力奉養生母王氏喪祭盡禮佃戶謝因積運將嫁媳焚其券復給銀以償其債康熙癸未歲饑施粥於東郊製藥餌給棺以濟危難鄉人德之

皮文忠字卓明淹通經史詩文自娛生平端方慈惠撫孤姪逾已子訓寒士卻其修嘗捐館貲以全隣枕還拾遺於人并不告名晚年戶主事族隣曲直咸就質成一鄉忿鬪胥平年八十餘卒都人皆墮

淚焉

陳應銓字晉衡國學弟南望力學喪軀遺孤兆邁在抱婆婦孤兒依銓爲命銓殫力扶持俾孀婦節著孤兒成名復取已置田產令姪與子均分他如施棺掩骼解衣推食建劔橋亭善行不一端癸亥歲饑又倡房弟治周施粥活衆邑令馮上聞院司賜匾曰惠周梓里

劉兆拭字敬修邑諸生生三月母湯氏見背張嵩隱之妻董氏育之稍長追悼所生遂以未逮事其母者事董氏邑人多其義焉

龍伯冠字公望邑諸生事親篤孝尤嗜義周急時癸巳歲荒將貯租七百石悉賑鄉隣不取其償隣有張某負債鬻妻情不忍離伯冠傾囊曲全其子若孫皆入庠序膺歲薦舉孝廉督學繆以澤被鄉邦旌其廬

劉一夔邑諸生家世忠厚夔尤篤於行義雖豐財而服御省約族黨窘乏胥取給焉多全人生枕假貸息不取盈貧難償者焚其券人多稱之

洪際今字卜周邑諸生好周急長子如鵬覘其父發金輒踴躍曰資竭否男尚有隙帛從容進飲饌津

津常達曙故際今勸善益勇孫俊登雍正丙午賢書

劉鎮太學生八歲喪母哀毀如成人父虞臣樂善好施每先意承志竭力以勸其成而於繼母尤曲盡愛敬無間言諸兄相繼棄世躬育藐孤有汜毓之遺風

譚光鉢字文芝攸東陘錯吉袁隅僻而衝行旅索莫者館舍不聽止宿鉢倡爲草廬於石橋之陽寒則編稔秸成幅兼資帖覆長夏設水漿束草噓烟蚊少行道指爲大庇傳舍焉

劉 整國學生字儼佩祖父俱任縣令整無貴介氣
習儒雅俊逸慷慨好義濟困周急無倦處世與人
無忤邑人士無不敬服親愛雍正六年邑令陳詳
舉其優

皮獻唐事父文忠先意承志凡父所欲爲必勉成之
如稱貸以助父築塋修譜竭力無餘逮父沒唐居
外齋時哀母老偶感有號天雲霧杳陟北山川修
之句是夕夢神遣歸人咸異之

譚仲儒世居巒山之陰清流潺潺常沿溪獨行歲時
外不與稠人接坐也同族玉生子立一小宗絕續
焉蕩遊羈滯不得歸儒消息經畫始得脫爲之婚
調酌其生息今子孫十餘輩矣

劉雲御字敬之雲南按察子祿之裔也三柱猖獗莠
民乘間掠奪雲指畫捍禦汗陌以寧張雲客里督
餉遺百金於道將營死自脫御聞而全之

陳之楨字幹臣仗義輕財里人林龍章負急將嫁其
媳楨出資貸償族戚黨親貧者必周急之邑令吳
標嘉其善貽之額曰德重一方壽七十五子有桂
其傑俱醇謹好善勵志成均悉本之庭訓云

劉摺見字克堅少勤學所志不遂援例職授迪功郎

雍正八年檄催就選以父年高不赴曰捧毛生之
檄誰與負仲氏之米乎友愛諸弟有雅奏壘篋之
風其還金歸產不一事妻王氏相助有成亦以孫
稱

劉其翺字鳳寰癸巳大水多漂沒偕其子任遠扁舟
溯洄人無病涉乙酉疫大作愚民溺於鬼獨持藥
排闥強使飲訖乃退時比屋大困翺合宅咸安帖
焉

彭燕祖字幼貽太學生慷慨任公彭族祖廟傾圮修
葺無人燕獨力創建烏葦聳飛各極其勝曰吾非
美觀妥祖靈而已祠宇傍有古樹數十株修竹數
十竿清流一灣燕造書房三間令子若孫咸肄業
其中又捐田租百石爲延師之費子宏績宏憲宏
緒宏經孫世法皆有聲庠序

張承鳳字鸞森持身嚴正時遠來奸黨假捕肆虐鳳
控上憲除之人咸高其義舉鄉飲大賓末年纂輯
家乘稿甫成病篤命次子可贊付諸剞劂

譚言聞字敬竹甘清靜僻居鳳嶺之陽塵市噂沓望
之怍怍焉越阡陌者僅矣隣里舊故省視周恤篤
其義耄期不倦云

蔡士鵬字扶九邑學生屢試不售尤以濟人利物爲懷常讀晦翁全書至荒政水利輒欣然彷徨每歲饑出穀接濟族隣小饑蠲半大饑全蠲且輸金鑿池灌流磽壤捐租贍渡利濟行人鄉隣至今咸頌其德焉

何祖楹字爲山國學生性溫量宏不自是以忤物寧虧亡以益人置渡田修大路固屬義舉而篤念天顯推讓父業尤義行中之卓卓者

周宏淇字占若子婦無私財淇若有天授焉父晚病癱左右不怠其撫恤門內慷慨不惜皆行其所安云

賀廷玉考授經歷髫年失怙事寡母謝殫誠竭力色養無倦銓部譚尙箴多其行誼數以書招入都廷玉以母在依依不離堅辭不就其孝行肫摯如此焦應運字文開邑諸生刻自苦勵同學莫敢望甫冠卽嚴立程課至老弗倦嘗聞薛孟嘗廣恕廉已闈門雍穆喟然曰大丈夫當如此矣故族人樂道閭里嘖嘖焉

何祖柱未爲院掾時欣慕趙恭毅公徽音丕績後跂足幕府竭誠殫思收六曹之遺稿彙成二十四卷

顏曰自治官書親鬻膳田二頃募工開雕經年載入京都公卿咸嘉獎之事詳官書序中

洪際珪字若純國學生忠臣洪雲蒸之孫少孤惟繼母羅氏存常以先大夫之懿行勗珪珪謹誌之有過羅輒撻之尤輕財好施歲饑傾藏以濟易簣之頃無他語但誠其子曰願兒曹讀聖賢書貧富之間不必深計

劉登簡字又曰父亡事繼母徐氏徐無子性好施與簡曲體母志有旅人親危病乞錢救之徐因登簡出外心欲恤之簡歸聞言追旅人數里給之嫡母張氏在日曾撫張姪爲子父不喜遣歸及簡父歿仍迎回劉分給產業捐銀修建祠宇完李姓之金於武陵崗全段人之枕於同里事行合義

朱世燦字日永家貧過西關渡拾遺金二十兩卽攜坐荒洲至暮次早徧出招帖三日後二十都李聖伯識認發完又年底於西城內拾遺金十二兩比時捷呼有本城顏雲照卽認發完後稍殷實建祠全枕焚券無德色孫之華庠生

劉生珠字晉郎府庠生少貧事祖母力辦甘旨及稍

裕色養二親所置產不自私分贍諸弟其他賑乏救荒恤孤存寡義尤足稱

劉聖漢字斐文爲友侯締文撫育二孤昏教授產如子康熙癸未歲旱初出食租繼罄所藏最後將親耕田典金救荒茶陵舉人劉淇贈以功同補助之額他若全枕給產祀祖捐租皆爲人所難

易爲棻字馨聞業儒嗜學構別業凡好學者飲食束修悉已出署縣張贈以集賢書屋出銀六十兩買船一隻賃船戶段生理併貸銀壹百二十金貨囤漢口被火棻以船與之變賣團其生枕貸金不索其償他若濟急扶危尤殷殷弗倦

易理族人久旅歸宗完四十年售己之宅不取其值撫族孤乏產給膏腴田二十畝免隣人葬母鬻身救同里疾疫置祭焚券除道成梁皆爲人所難歐陽士海字宜山職員性孝友少家貧養親必以甘旨進父病每夜露蒲禱天延齡尋愈後二老年至耄耄弟廷相朝宗相繼早逝海撫其子女教育婚嫁心力交瘁他若育嬰周急焚券全枕無稍倦歷任邑令獎之子命樞命櫬監生命權增生

劉殿英 林巨觀 劉以韓 陳子祥以上四人於

雍正十二年捐社穀賑荒知縣許搏翮通詳給匾
獎勵准免差徭

羅成禮字旦依生而穎異孺慕性成年十二失怙哀
毀骨立廬墓盡禮事母盡情竭力殯葬禮如初他
若推財讓產撫孤恩勤建立家塾捐置祭田皆見
孝思不置也

劉其泐字宋水邑庠生天性純孝事繼母如生母服
勞無倦母性嚴肅有臧獲以細故得譴其泐輒負
杖匍行以進母怒立解其色養類如此

陳建鐸字覺世性至孝父病每跪奉湯藥禱天願代
撫弟錚又極其愛同爨五十餘年復以自創田產
分給康熙甲申歲饑餓孳盈途鐸獨體母意捐米
施粥全活甚眾至於修祠築墳撫孤恤寡凡諸義
舉皆所樂成

劉士殿由太學授州同孝友端慤族黨奉爲儀表平
居義行常恐不及輸租供祀捐金建祠班班可考
獨建酒舖江義渡俾問津者無憂及溺厥利尤溥
陳建鐸幼孤家貧事母菽水盡歡撫弟鉉克兼父道
所創產業悉均分康熙十四年粵西騷動檄募贖
馬無應者鐸獨仗義勤致有成功亦移孝作忠之

一驗也

宋明言字君任天性醇厚終身無忤物之色然與人
排解殊堪慨自負也少承伯父後塾師講生事之
以禮嗚呼竟日故爲人後而不忘所生焉

陳夢鶴字觀偉國學生平生砥節勵行篤宗盟厚本
支蠲貲濟貧慷慨好義人咸稱之

譚光琳字祝順接人以禮有窘迫者出來修佐之甲
寅歲建育嬰堂捐貲以助樂善不倦鄉人稱之
張漢芹字呈安號綠野有古風樸儉言笑不苟好施
予喜賓客延師至敬于三兩列鬢序

周翼君廷望性耿介歲歉竭藏以貸伐石造橋以
便行人人稱其樂善云

謝自周少失恃除喪而哀未忘父憐其情繼娶劉氏
以鞠之問視一如所生人稱其順

賀公華字小赤秉性淡泊嘗客衡州於鐵爐門拾遺
金次早見尋金者至全還之精岐黃術康熙乙酉
大疫投丸輒愈兼資藥餌亦不責償子輔宸廩生
踵其懿行人稱其德

歐陽光朝字乾三庠生康熙癸未歲大旱晏都石子
陂黃埃野村民苦楛樨無所施朝出貲作江車

十五乘兼給酒漿引水溉田數百畝是歲大熟永無亢旱之患至今鄉人德之

劉元捐金至枕遇荒出穀以周里黨又嘗施藥資以活人倡修族譜焚佃欠券生平好急人急遇事疎財重義性固然也

李名舞字景品行端方邑舉鄉耆族舉理家政仗義執言咸服其公是以族里無一字入公庭前吳逆兵荒出和穀二百石以濟避兵之急屨入司則焚券約二百餘金至今猶思慕

劉伯沅品行端方甘貧好學族推戶長年七十倦勤族堅復舉乃倡修祠宇祖塋及置祭田規畫盡善年九十一日聚衆言別而逝生平遇隣里爭竭力解紛所遺著作力難授梓

胡挽字名世國學生志不獨爲君子行克符大義雍正戊申挽同舉人劉士夔於南城倡建榮封關聖帝君五代殿字癸亥大禮同庠生劉士蘭十人捐粥賑饑壬戌水災同劉霽庭倡備棺以歛茶陵州浮屍全譚人枕救蕭人病事多可紀至如敬奉繼母慈育孤甥孝義並美族無間言

陳子祥樂施予鄉里有急者周恤之雍正十二年捐

義穀百五十石縣令許嘉其好義題之

陳顯字孚遠邑庠生贛縣劉寡老而愚廬陵拐賊
很而狡給寡曰湖南樂郊遂挾其長子與媳來彼
至則東西割賣矣復給曰田園修治挾婦并穉子
踵至經顯門窮詰得其狀劉乃泣顯代訟三年寡
得子媳四人聚處

龍月藻字鴻飛少貧後稍贏餘鄉人多賴之修家廟
助數百金族咸稱無間言

侯鎬字京山賦資英敏嗜學未售孝養父母卽叔
父母亦奉祀無缺救途餓將絕之人免積欠以全

枕置祭田修祠字盛暑施茶歲

餓施粥修橋築道
路其好義類如此

陳國鼎字匡之號直齋舉鄉賓好義急公居鄉以濟
貧利物為事温恭弗懈敦厚可風

陳凱泰字頌寧邑庠生二好義性成父開韶病篤祝以
身代事繼母承歡無間志端行潔全枕施塚擇繼
撫孤族黨稱頌壽八十二

文德秦字或西邑庠生素行剛方宅心仁厚聞同里
劉某嫁妻旋捐館金二十枕賴以全流寓王某暴
骨道傍捐貲埋葬并禮其姪歸之鄉人共高其義

唐德諧字爾弼邑庠生性孝友推所分田園悉讓諸

兄有古孟元風拾得李芳春遺金悉還之倡葺泮宮文昌閣及賑饑圓枕樂善不倦二子天柱天植俱列黌序卓有交風孫枝蕃昌人以爲積厚所致夏正賓字迭友太學生平輕財好義助置學田倡輯家乘及全枕諸善行傾貲不吝嘗娶妾爲奸人所誤詢之知爲良家女卽呈請當事捐金遣歸遠近稱之唐汝鼎字敬宇古道待人善蓋一鄉舉賓筵邑令朱英幟昭以額曰令德壽豈課子德新任衡陽教諭年八十九以壽終

彭宏暹性廉潔取與不苟族有貧難償債持破鏡而

中夜泣者捐穀全之與兄生員述倡修宗祠輯家乘貸費不惜逢歲稔解推以賑鄉人咸德之人義士祠

尹之濬字金一端方好義稍餘卽以濟隣不能佃者

免租不能殯者給棺族有貧而單傳助續其後常費已資排難釋忿壬戌歲饑給無利穀於鄉都人稱之

歐陽昂字秋友邑庠生康熙甲申癸巳捐穀四百餘

石賑饑穀盡又貸銀糴運接濟於弟昆倍切友愛

全枕施棺建橋修路里人歌頌之

艾廷璣性好善族人艾雲負債鬻子璣憐其單傳捐

金贖還代擇良配給田產康熙癸未歲饑捐米百

石施粥通衢活民甚衆邑令張以一鄉善士

賀宗榮字南侯坦易無矯飾與人交然諾不苟人有

急濟之恐不及訓子弟寧拙勿巧長厚之稱

陳治鐸字天以三歲失母事繼母以孝稱父沒家無

中人產鐸獨力撐持繼母所出諸弟妹咸仰賴焉

分多潤寡至老不異生平狷介尚義雍正初都民

有奔溺者急命拯之詰之知失所貸金五兩即如

數贈之其篤行類如此年躋九旬承歡五代乾隆

元年以耆壽奉

旨旌表已入府志

劉登安慤而貧好憂人之急悉力以奉人稱為摩頂

公

劉廷才天性樸質族里稱仁厚父麟寰生子三長國

一早卒才撫孤成立婚教畢業才病遂不起以好

亟囑於弱弟廷圭曰善待之無遺地下憂絕口不

言及已子

張顏字如聖性樸素不事雕飾戒子弟遠浮囂與

人往還喜怒不形於色鄉邑高其行誼公舉鄉飲

邑令朱及張李二學師俱以先生稱之而不名

丁世寬字三吉慷慨重信義里中匱乏者推解傾助無吝色有移貸百金行商虧本貧不能償遂置弗問人以爲陰行善云

吳德章字煥公持躬謹厚尤好周急嘗宿漢口有艾子羽因官逋三十餘金將鬻其妻德傾囊以贈歸途蕭索衆皆笑訕終不爲悔

劉探珠字霍英性惠愛有郭媪曾乳探探憐其貧歲給租以養天年又表姪周某貧不能娶將毀盟出已貲令其成婚戚里稱古道焉子傳登廩生負才力學爲時所推傳發國學卓立不羣

王閏齡字良玉天性慕義堂兄子文卒撫兩孤姪嘗推宅分產康熙癸未洊饑出穀賑濟里中賴以全活其他捐租爲梁無稍倦人咸義之

艾瓊瑤勇於從義攸東界江三水合會每春漲行人望洋心惻瑤造舟濟渡糾置義田以垂久遠子揚教名尊聲洪列膠序復捐四十金買美冲田租三十河石繼成父志

胡爾蒸字以陶邑庠生 陳待詔字仲徵職監
易起光字子燦 陳耀宗字爾旭

蔡皚生字旭上職監

五人於康熙癸未大荒共捐米三百五十石自五月初一日設廠東郊至六月中旬隣境流民紛集復借領常平倉穀接濟秋熟平招納倉活人無數次年甲申五人又與向文程謝士鉉捐米於城隍廟給粥濟荒

王締文 范西文二人素行好善雍正八年知縣陳文言詳請各 上憲給匾獎勵

蔡 灝字貴安秉性誠樸篤宗嗜義倡修纓公分祠置田承祀募建棲鳳茶亭暑月侍茶一子七孫曾元繞膝親見六代夫婦並躋大耋灝八十二卒

文嚴伯素行慷慨建祠置田修路免貧佃租全房姓枕有貧難厝親者貸金不責償以壽終子孫繁衍侯祖序監生孝友樂施歲歉以粟貸人不取其息遇孤貧卽施綿襖建茶亭置田十畝刻送航中航千冊引人向善邑紳公舉善士邑令莊詳請獎之

譚進世州同好善樂施建奎星樓費千金倡修城隍廟關帝廟捐建介菴置齋田八十石及倡修祠宇置祠田輯族譜諸義舉子際華貢生復助修城隍廟關帝廟孫永基監生

奉母劉氏命復修奎星樓費五百金邑令趙額獎之

胡 岸字誕登幼失怙事母蕭孝同懷弟一崧性豪

適以友朋爲性命揮霍不貲任其推解至老怡裕
倡建祠宇捐置祭田督修黃甲書院助數百金無
少吝每歲施米貧乏多蒙其惠年八十卒

文承鳳字儀五舉人性嚴正言動悉遵矩矱族黨爭
訟片言立解新學宮建考棚捐貲倡建舖屋爲歲
修費經管數十餘年矢公矢慎督修黃甲書院不
辭勞勩邑令委掌生童膏火經理盡善其他鄉城
義舉甚多子自軒訓導轉輅輔均列庠序

劉仕莘字舉伊庠生慷慨好義閭黨有爲人侵侮者
領囊排解家故貧延師極豐招族戚俊秀與子弟
共學成就甚多孫祖穆舉人祖程庠生

龍士瑰字以贈封職素性樂施恤孤憐貧鄉里忿爭
常攜貲以往無不立解公舉都耆邑令馬以齒德
兼隆表其廬

皮承雲字少坪歲歉出無利穀五百石貸鄉里貧不
能償者焚其券歷年不怠設粥通衢賑饑其他義
行尤多邑令贈以範束一方之額年九十卒

鄧朝儁字智岩有陳某貸銀數十兩因逋欠甚多遁
去朝儁招歸諭之曰爾獨不顧老母之需養乎立
焚其券更佃以田每遇歲荒貧乏者多爲周卹

歐陽傑字天樞監生十齡失怙卽刻苦就學思奮舉
場以慰母氏未獲以生平篤於本行輯譜修祠有
幼孤王繩武姻黨也傑受託扶育成立不墜先業
人咸推其義云

胡禮儀字相九貢生慷慨好義助修震陽樓及震陽
書院數百金持齋禮佛獨就內典父東山年九十
餘孝養甚至孫曾纒膝親見五代年八十餘無疾
而卒子自獄歲貢 曰受庠生孫景開舉人餘皆有
聲庠序

余鴻封職字恭承 子父母孝友愛兄弟性善施予邑
中義舉解囊無吝築橋梁修道路置義渡倡捐中
湘舖租辛酉歲歉穀值甚昂減價碾米發糶邑令
張贈以義冠前哲之額子嗣俊傑出羣衣冠繁盛
鄧世御乾隆己巳與族庠生鄧朝陽鄧斯詒等與賀
姓同修建 崇聖祠

蔡雲貴庠生事親孝友愛幼弟置產均分殯歛孤寡
捐租建茶亭並租十石供佛油燈有因貧出妻者
給穀全活頌示嚴禁宰牛刊戒食牛文勸世經理
戶事誘掖族中後進子錫三舉人

劉傳珠字上選監生慷慨樂施倡建祠宇捐置祭禮

不下千金鄰有蘇某夫妻失和互訟議嫁力釋之
貸金不責償旋靜好如故董佃積欠逋租概免邑
令張嘉其義贈以聯云立脚怕隨流俗轉留心學
到古人難邑有公事不辭勞勩倡修橋路仗助甚
多子萬湘監生萬澤州同萬沅萬湟萬濤俱職員
王名照國學生事親孝謹嗜學不倦於先哲格言手
錄成編恒自勉勉人有窘佃將出妻償租爲槩免
以全其枕與兄名熙倡捐社穀助修考棚葺宗祠
增築產竭力不倦其庭訓尤切惟以處善循理爲
要子廷倫廷價廷倬監生孫之賓之芳之寵之賓
之蔚之璵之夔之璠之芭俱列庠序之宸附貢曾
孫珍廉諸生珍典珍贊俱廩生珍興增生珍篤諸
生

羅文翰字青揮監生幼失恃事繼母孝倡修宗祠及
里中橋梁道路不吝多金凡合邑公事文翰父子
先後捐金協力仗助以成義舉子學鴻庠生學鳴
監生

吳盛瑞號國祥監生攻舉業性孝友修本里石橋一
座涼亭一所施茶解渴歲歉酌免佃租里黨紛爭
力爲排解年八十四卒五世同堂子先超先起均

庠生孫襄禮習禮敦禮均監生

劉錦林字樸園庠生遇里黨紛爭片言立解矜卹貧乏輯家譜築祖塋凡陂塘寺觀糾首倡修戚族高其誼贈以環頌國琛之額

劉廷魁捐修山田通衢橋路二次並盤田石路車江
因橋費銀數百兩助修陽昇觀道院出貲助房姪
某婚出銀四十兩爲姪某贖屋佃戶李某將嫁媳
償債出銀五十兩全之

董宏諤職員性篤友愛同祖兄弟及弟姪無依者代
營衣食倡修勝塘陂溉田數千畝將己田出售濟
用詎工計費千金邑令張有記倡置橫橋義渡田
建祠修墳周卹鄰里子遠猷倡修橫橋陂兩岸石
路置田以備補修

劉大基字元剛例授九品業儒好善慷慨尙義捐星
都大旺田租四石三桶入書院倡修本隴木山灑
溉田二千餘畝又築黃泥港石橋石路費二百餘
金人咸推其義云子建章孫懋官均列膠庠

皮祖仁字漢汲監生主家政三十餘年公平無私人
有忿爭傾囊排解壽至八十親見七代無疾而終

子殿珠列膠庠

吳定昌職員捐社穀百餘石以賑貧乏堂兄弟有不給者或與以金或輸以粟無吝色凡寺觀橋梁輒出貲助修長子職員次貢生次監生

劉世琳字衡珍附貢生英年績學爲宗工所賞事父兆平母熊氏先意承志季弟早遊撫孤姪如子姪復天更撫姪孫建祠置田輯譜修塋倡修關聖廟蓮花寺小波渡萬全橋子培葵監生亦好善有父風

艾延芬字振裁周卹族黨獨修慧燈半雲白法華山四庵數百金晚年力戒殺生常居慧燈庵無疾而卒子四均列膠庠

劉家湛字立照孝事父母友愛兄弟修橋路不吝厚貲捐助社穀邑令馮獎以好義可風之額孫自美白薦自菡監生自英職員

劉振寧字世清秉性孝友溫恭義舉甚多邑令田爲立傳

皮祖智字端四監生外族有遺孤無依撫養婚配比長置產遣歸江西運糧丁賀某貧無運貲迫宮限欲自盡智憐之代運至京費三百餘金他若助婚

續嗣給穀賑饑初無少吝

朱功懋字鼎侯庠生工文屢躋棘園督修 崇聖祠暨湘南書院並捐膏火助修西閣及本境橋路免佃積逋人稱其義

尹道行職員父六庵苦學未售抑鬱成疾曲盡孝養兄寅春早卒爲捐租入祠復捐租四十石以爲祖先生辰祭需倡修神區橋雙江橋周卹族黨甚衆龍雲高字颺廷職員守祖訓承父歡終身無疾言遠色常免佃逋卹困乏遠近德之子七衢安福訓導驥附貢生馴州同駿驥文均諸生孫曾濟濟皆其

培植云

艾鵬飛字搏萬庠生因困棘闈廣宣因果著法戒篇周濟貧窘倡修道路置柘桑渡租給舟子工食捐義穀以備同里凶荒

楊廷宇慷慨好義和睦兄弟子姪有不足者給錢穀濟之獨修笙塘鋪山路十餘里鄉黨有爭多爲排解年八十餘卒

鄧斯詒字裕宗合家灣義渡春夏泛漲修整船橋族子有鬻妻償債者出貲全枕里黨有急周卹之

文錦字尙綱附貢生事繼母如所生捐修祖祠獨修

貓頭橋本都石路共費六百金

譚慶頤字舒期監生孝親敬長人無間言捐金全枕焚券免逋族黨忿爭力爲排解年七十五卒

劉昌藻號柏莊貢生孝友醇謹凡義渡道路橋梁及里中貧乏皆助貲不吝主戶事廿餘年咸推公慎年七十四卒子文楚貢生文標州同孫光暉庠生陳仕榜性好施與建支祠置祭田二十畝里中柘桑渡船捐百金倡修凡橋梁道路伙助多金歲款出米百五十石以賑年八十時邑令張贈以渭水同齡之額

艾大華字唐夫監生性友愛好施舍自創田產分給各姪倡修華藏寺費數百金倡建泰靈科甲二橋兩閱寒暑不辭勞瘁獨修大坪官路

詹世琦父歿事繼母孝督課異母弟成立悉以近處祖遺產分之臨歿更以己田給胞姪與姪女族子有應試缺費者恒給以貲糶穀不論豐歉無二價屢修橋路行旅稱便

歐陽光典偕弟光琦輯譜修祠倡修橋路歲饑出穀以賑貧佃不能完租者概免之

丁文益事母孝友于兄弟每年貯穀貸里隣不受其

息焚券全枕修築古墳人咸義之

雷成麟字孔瑞監生倡修族祠家譜經營不遺餘力
弟成鳳早卒麟撫教幼姪成名設家塾聘名師獨
備束金年八十三卒子盛雅盛雋監生盛雝職員
張瀛洲嘉慶己巳出米數十石以賑鄰里捐置黃山
義渡田畝並修西水橋及界江隴石路三百餘丈
鄒嶧少肄詩書屢試不售遂業醫請治者輒效不責
其酬本境大小橋路竭力助修周卹貧乏所焚借
券近四百金

蘇揚昶號廷山質直尙義素有隱德嘗好施予里黨

有不給者量爲依助錢穀一門聚慶五世同堂年
八十九卒子元監生孫興暉職員興道貢生克紹
先德

丁文林歲早出穀百餘石以濟里黨宋佃爲債家所
迫將鬻妻以償概免其租出貲全枕助修各處寺
觀橋梁

盧士楠父成章故兄弟五人皆窘楠獨養母二十餘
年存歿盡禮置祭田倡建宗祠助公舉俱不惜貲
宋世祿字久尙封職胞叔無嗣代捐祭田入祠族中
有未婚者助以貲鬻妻者全其枕歲荒逋久悉焚

其券橋梁損壞捐金修補子昌期名顯均列序
昌朋職員

周劉榮號桂園監生慷慨尚義捐建分祠排難解紛
歲歉每以穀貸隣右不取其息毫無德色子監生
道立恪遵庭訓不惜己貲平化里黨忿爭歲歉賑
貧乏亦如之難償債者立焚其券且好施不倦獨
修水金橋水口橋東洲泉橋路不吝多金孫中規
未弱冠遊泮旋食餼貢成均

譚大昕號曙軒貢生性伉直族黨公事營助無吝色
子章典貢生虎炳庠生世簡章漢職員章誥監生

譚斯柱性篤孝友事祖母惟謹兄弟四人長定詳次
純仁貧窘柱割己產代清兩兄積逋人有急難常
樂推解

劉漢藻字文海性直品端幼失怙事母孝事諸兄恭
出貲贖劉某子全唐某枕捐義渡田倡修橋路妻
王氏亦樂依助目擊四代年七十四卒子家駒監
生天性純篤恪守庭訓同里公舉孝友

尹祖雷封職字震雲秉性剛直築橋梁修道路置義
渡全枕焚券力行善事里黨德之相助書院膏火
租二十四石有碑邑命張贈以教文可風區賴子

高翔高鵬俱職員

劉應發字藜青國學生孝友性成好義可風助修五里排石路子起鵬能承父志獨修通衢石路十餘里費二百餘金孫虎文諸生

劉國定字一正貢生嗜學工文父歿事母孝姪孫幼孤撫卹甚至倡建支祠助修庵院施藥拯貧受惠者衆又奉母命捐租入宗祠子自彙例授主簿亦慷慨好義

楊肇鎬字周載監生好善樂施子昆季兄早逝遺姪某僅生女郎傾產遠遊不返鎬周亦兄嫂老弱

安恬子興第職員克承父志迎養伯母如所生爲其孫女擇佳婿鄉里義之

焦大偉監生分胞姪以產業助以婚費堂姪等有衣食不給者予田耕種歲歉多方賑卹捐義渡租三處獨修黃坪州紫泥橋石路十餘里

蔡貽陽號鳳山職員捐書院膏火銀四百兩助修震陽樓銀一百兩捐入大小宗祠租共三十二石靈龜峯及各處寺觀量力扶助義行尤著

劉國賓職員倡修里中四橋助銀二百兩捐社穀三十石義渡穀十石華藏庵油燈田六畝

彭宏質里中笱時泰貿易得偽銀哭訴於質卽具真者如數與之將偽者立投諸火曰無累他人有欠賦拘繫者代爲完納

陳斯言事親克孝有徐佃逋租數十石將媳出嫁立免其租代籌全枕橋梁寺觀量力扶助

王伯偉倡修丫江橋普濟橋領家墊給置租七十餘斗年八十一無疾而卒

丁文霞職員服勤詞學砥厲廉隅捐貲二百餘金倡建宗祠父作汝遺借券甚多概焚之兩全人枕屢減佃租獨修詳圖橋雙江口橋並諸橋路子啓遇啟遜啟遠皆監生啟龍庠生

焦宗陽同懷弟宗翥客蜀死陽遠攜孤姪歸里撫育成立析以己產族隣忿爭出貲排解有貧而出妻者爲全其枕橋梁義渡皆竭力成之

周肇文職員性耿介篤友愛撫孤姪成立延師督課修祠輯譜捐置祭田族黨有爭片言排解人咸傾服里中有溺女者力爲勸救倡修百歲橋並樓脚隴石路十餘里不吝多金寺觀亦多助修

劉滋榮里中洞嶺橋久圯出七十金倡修並伙修南陽寺及道觀周某負欠百金爲焚其券

劉聲濟寬厚之心行義不倦族閭稱爲長者子自亦
監生承父志好濟物嘗倡修田心屋石路數百丈
焦宗盛歲饑減價出糶貧佃逋欠概不責償並焚劉
某借券獨修石路十餘里並石橋三渡

陳九叙國學生幼失怙恃刻木爲父母像祀之族兄
一雋無嗣以孫承祧爲資婚配給以己田捐修藍
塘橋石路施棺給藥子渭潢國學生里有斗堂庵
亦承父志助修

劉應烈字乘六 封職獨修廣濟小園橋一連朋修
廣濟大橋一座費三百餘金子祖劉國學生

張光瑚里中有貧不能娶者助婚費貧不能殮者施
棺木橋路傾圮量力伙修戚友窘急多方拯卹人
咸德之

皮殿平號衡如貧佃逋租多不責償有巫姓者負欠
三十餘金將鬻妻平惻然完券以全其枕年二十
七年妻顏氏矢志撫孤守節

焦爾嶸兄爾崢遠館湘邑二十餘年嶸獨養父母無
懈與兄析產易宅毫無爭競捐置祭租以奉先祀
解釋族黨爭訟

劉聲濟字實夫少習舉子業後精醫調治險症並不

索謝傾囊以濟友困依助隣里昏喪免貧佃逋租
勸釋雀角不使興訟子祖向能承先志

張文明附貢生父閑善早逝事繼母湯孝出貲助舅
氏李某婚費並置田以贍其家妻弟譚某家計甚
窘代籌衣食兼依聘貲建祠修譜置多寶林齋田
六畝

單文斯修雙江橋並渡船石路修整孤墳捐祠租五
十石書院膏火四石

鄧德希友愛兄弟合爨多年捐置祠田並雙江口渡
租二十石張某將嫁媳償債出貲爲之團聚

夏瑞宇廷舉州同性無機械見義必爲獨修宅左通
衢石路費四百餘金施棺以百計族墳未修者會
豎碑整數十塋至他處橋道及邑中公舉捐貲尤
多子四鳴盛應奎大魁俱庠生

譚際星號彤雲才具明練慷慨好義督修震陽書院
其他公事皆任勞任怨嘉慶丁卯歲歉出貲以賑
貧困兩全賀姓之枕修整先世祖塋合族賢之
劉世發監生慷慨尚義弟夢相入泮旋卒無子爲立
後析已產予之里中貧不能殮者施棺百具本境
津梁寺觀助修不吝子聲泰監生

譚宗璋字蕤奉性剛介無城府主戶事修祖墳捐書院膏房租二十石助修心田灣石橋邑令田獎以慷慨尚義之額

劉文錦職員邑建震陽樓踴躍樂輸倡修宗祠家譜遇有橋梁道路多出貲助建有戴姓者戕其祖墳獨力赴公庭直其事乾隆甲辰水災父母棺機淪沒奮身營護歸葬邑令蔣以孝義獎之

劉錦輝有寄白金而乏嗣者命其子庠生琳爲修墳墓其生平訓蒙所得資脯半以周親鄰貧乏琳亦能承父志不懈

李振滔字仲漢忠厚性成倡置橫橋陂義渡捐租善後佃債難償者輒焚其券至捐社穀營祠宇修橋路諸義舉著聞鄉里年六十八卒子四光邦監生光顯光翰俱職員光林監生

謝仕安性謹厚姪孫某債迫將鬻妻安代償以全其枕俾得生子綿祀建宗祠置祭產施棺槨修石橋建亭其上行旅便之子六洪海漣淮法洮職員孫會繁衍壽七十七卒

陳輝飛字扶南生平廉潔自守家不中貲遇人有急必多方求濟鄉里德之子箋國學生克承先志

譚紹書字兆祥職員天性好善獨建譚家橋費二千餘金爲義舉之最他如倡修祠宇置祠租築族墳均不惜重貲修十方堂資福寺置田以供佛葺包公殿清陽觀捐租以事神砌花石壠江家壠二處石路行旅稱便綜計捐租不下百石費近萬金專意經營至老不倦

董裕昌名學福敦行好義倡建迎真橋經營盡善子宏德監生承其志修橋修路施棺費踰千金又倡修長石陂溉田二千餘畝孫先登附貢

李振邦字鼎南貢生孝友敦厚里中社穀爲人侵漁成訟邦約族捐賠得息倡置義渡捐租善後建祠宇創祭田解紛濟困著聞閭黨子四光楚監生王杞齡字伯宏封職敦本好義貸人錢穀不取息力難償者蠲之貧艱葬者恤之襄建宗祠倡置祭產獨修四橋不吝多金子吳職員

符世柱字廷按監生贈武畧佐騎尉素行好義遇里黨忿爭務竭力排解保全甚多凡募修礮路無不捐金欣助歲歉隣右不給者每賑卹之子大鰲監生封武畧佐騎尉恪守庭訓力行善事捐金重修

祠宇獨修廻龍礪新礪學堂礪等處不容重貲至
於一門友恭與兄監生大烈弟職員大炳大燭奎
老怡怡尤爲可風鰲子宗起職員宗邦貢生宗璋
衛千總

義行

文德銓性敦樸好善乾隆庚午年歉出所儲穀貸鄉
里不責償每歲冬輒修孤墳子淋淑哲洛俱敦孝
友增置祭產孫自幹倡修族譜恪承先志曾孫舒
坦廩生元孫世策庠生

胡松茂封職天性醇厚敦孝養隆友愛倡建宗祠增
置祭產釋爭勸善族黨咸欽子家燦先意承志益
擴前謨孫勲業儒業定業篤於倫紀慷慨好義曾
孫文理理問職文珍貢生文瓊文琬文雅俱監生
泮臨泮藻俱文庠

陳鳴珂字荆山廩貢生孝事父母承歡出於至誠弟
監生增曜早故撫教孤姪自訓列邑庠自詳入成
均俾弟婦劉氏得以全節載縣志又倡建分祠及
父叔二公享堂倡修泰階橋慧日寺無分毫私至
於周恤族戚窮乏排解隣里忿爭公事樂捐尤多
至今稱道不置子自成自道俱列成均

張積鍾貢生 誥贈朝議大夫生平慷慨好義捐修
十妍江石橋三灣石路全枕施棺息爭勸善倡建
族祠興家塾族黨咸欽子士湖孫方梓候選分府
遵例請封二代

劉茲清號舒莖 誥授朝議大夫少儻排難解紛
有魯仲連風蔣春岩廵道宰漢陽時延爲幕賓資
其幹濟經營二十餘年倡建祠宇費千餘金修仁
公橋費百餘金捐修 文廟大成殿銀二百兩捐
租五十碩入興賢堂其他道塗陂梁無不樂輸子
三長來達州同次來達府經歷三思訓候補府經
符世柱字廷按監生贈武略佐騎尉素行好義遇黨
里忿爭竭力排解保全甚多凡募修礮路無不捐
金伙助歲歉隣右不給者每賑卹之子大鰲監生
封武略佐騎尉恰守庭訓力行善事捐金重修祠

宇及廻龍礪新礪學堂礪等處不吝重貲至於一
門友恭與兄監生大烈弟職員大炳大熠至老怡
怡尤爲可風鰲子宗起職員宗邦貢生宗璋衛紳
鄒肇發天性孝友睦族和隣每年以穀給發貧民並
不取息臨終時焚券三百餘金其生平好善樂施
不可枚舉里黨至今稱之

歐陽逢年號亦田國學生爲人任俠敢言凡事必據
理以爭雖豪右不稍讓遇孤弱則振之乾隆辛酉
壬戌年饑民艱食盡出所積穀數百碩減價以糶
無錢者貸之遇文人有加禮若窘迫則力爲俛助

其他合邑公舉暨修礪梁除道不吝捐貲以成其
美長子文鷺千總職次文彪貢生三文鳳監生

陳斯璠貢生言行不苟慷慨樂施不輕然諾有約必
踐人有患難事或負屈者常直言以伸其枉族黨
貧乏者給粟不取其息妻賀氏能體夫志凡所欲
爲多方俛助以成厥美難於嗣勸納側室唐氏連
舉七子俱列貢監職員子早卒媳譚氏矢志撫
孤道光庚寅年列節孝總坊

陳懷職員秉性肫篤娶州同丁文元之女亦克盡
婦職父雲際早逝懷與妻丁氏奉養孀母譚氏曲

意承順得其歡心且尙義好施周恤鄉里樂善不倦丁氏恒出紡績餘貲以勸厥成人稱孝義之門子五自烈封職自薰自煦俱監生孫星章星昌俱職員彭煥徽字迴南國學生慷慨好義釋爭解紛不惜勞費他如修葺祠宇倡置祭田纂輯家乘凡分內事率以身先族有鬻媳急出金以全其枕壽八十有五五世同堂子澤柳貢生曾孫永芳職員

州

廖志道職員性剛直與人排難解紛不避嫌怨綜理戶事倡修宗祠及修橋路諸善行皆傾貲不吝逢歲歉施米賑貧里黨均蒙其惠以壽考終子盛光大學生盛典庠生盛斯附貢生繼承父志踵修橋路增捐祠租捐入興賢堂租十碩孫曾十餘人入庠者三人

吳世珽精醫存心濟人不計功利倡捐分房修墳會

出金獨多經理不苟至今繼置產業乾隆乙酉年
歛盡出所蓄以周里隣子緩萬亦好善樂施孫青
雲慶雲步雲俱守先業曾孫兆炳英年食餼

洪開適字斯安號靜莊監生性剛直品端方一生未
到公廷里黨公事公營助無吝色平化忿爭出貲
排解助建馬鞍山上凌雲塔有碑修大江源蹊水
礪路鑿石開新陂蓄水灌田數十畝鄉里頌德邑
令張竹泉獎以箕裘濟美匾額捐租十碩入家塾
教育族中子弟捐租二十碩爲賓興局公費年七
十九卒妻皮氏五世同堂詳祥瑞門

譚章煇字耀亭由庠生授遊擊性伉直見義必爲與
文炳若胡六門等倡建馬鞍山塔命長子國恩督
修閱歲始竣工 文廟正殿朽壞倡文炳若余子
衡復修費千餘金耀出貲獨多偕弟郁文修葺宗
祠倡緝族譜捐祭租數十年七十三卒子國恩
舉人國忠封職國恕千總國懋由廩貢候選訓導
國志州同孫十餘人皆有聲膠庠

張國瑞字信亭由庠生授千總素性慷慨樂善好施
修門首新橋石陂石路不吝多金又修助大哥廟
遇歲歉減糶以周隣里排解以息忿爭凡邑中公

舉無不樂輸又倡置冬至祭田本房祭祖掃墳祭
產均載人家譜子積芳貢生孫文旭文生文景業
丁尊礪貢生賦性剛直爲州同閻若公仲子弱冠列
上舍從外舅文學羅夢樓遊以翁老代理家計主
戶事葺祠宇修譜牒增置祭產倡修橋梁道路皆
以身先邑中公舉皆捐貲倡修至完券全枕周恤
貧乏毫無德色晚年屏棄外事不履公廷夏大史
恒過訪書尋樂二字於齋中並題愛吾山房年六
十八卒子亨貢生採甲煥甲監生

王緒星號南垣州同職素行重義每遇歲歉減價糶

糶放無利穀多不計償貸無完者卽予焚券因貧
嫁妻者出貲全枕里中修葺橋路捐金不吝城中
重修三官殿獨捐錢一百千文公建凌雲塔捐錢
一百千文前署縣張梅坪贈以爲善最樂之額年
六十五卒子萬春州同祚忠庠生祚恩業儒孫多人
歐陽命樞字侶才國學生年十六卽主家政延師教
督異母弟二人俾皆成名遇邑中公舉必慷慨樂
輸乾隆癸亥年大飢倡衆共出銀六百餘兩施粥
賑荒知縣馮運棟申詳上憲錫以惠周梓里匾額
年七十卒子孫多列膠庠

譚聖極字京王世有隱德讀書不遇家素封有親其
援例捐納者輒揚然曰大丈夫烏用此浮名爲生
平施舍不吝能見其大至於蠲租焚券全枕諸義
舉陰行善事不欲使人知子道世 誥職漣世貢
生孫曾均列贊序

劉子達讀書不求聞達隱逸山林性恬靜寡營然好
義周急見人之飢寒則恤之聞人之困阨則救之
其修葺祠宇倡置祭田捐建橋梁俱有碑名實跡
可稽壽躋古稀猶樂善不倦云

歐陽上簡性正直敦孝友主戶事倡興合族義學獨

捐租二十石捐助合邑賓興局租十石修築河至
頭石橋樂捐五十金其他義舉甚多今雖卒子孫
賢肖實爲積善餘慶

湯祖英生平寡笑言敦樸素好善急公凡遠近造修
橋路及寺觀各功果每施金不吝並不樂名逢歲
荒出倉穀減價發糶鄰里德之子德新列國學

彭元性字義門國學生爲人明幹篤誠里黨素行信
服道光九年倡修襄都毓陂十年十二年連遭大
旱賴陂以濟前縣楊養田贈以澤墜粉榆匾額表
其義行又爲序文頌其六十壽辰子四人次彭燾

入邑庠孫多人長春田已遊太學

陳輝濟字奇夫授從九孝友廉介質直尙義敦宗睦族里黨有不給者施予無德色倡修上洞山關石路數十里焚券四百餘金免逋二百餘石凡鄉城義舉尤踴躍弗吝焉萍邑候選訓導周學濂族副貢陳燾廣文錫東曾作義士歌以贈之壽八十三卒子增瑞孫自樹均監生

歐陽金璫字湘屏孝廉立煖仲子也嘉慶丁卯舉於鄉試禮部列明通榜補景山教習不就道光元年授岳州府訓導六年以母喪歸里鄉學舊有捐存錢三千二百緡貸於商按月取息給膏火後商以虧官項遁合緝不得事將寢乃謁令畫策彌補始復其舊道光癸巳歲歉民苦納輸權令林坐士民百餘以逾限聞於上笏委知州登銓治其事風規甚烈湘屏與有舊反覆辨白遂獲免是年夏飢民相劫掠請有司發常平倉不許湘屏與邑紳力爭署名貸穀出減價平糶又勸義士出貲運米接濟

二旬遂安其有功於士民甚大甲午再補宜章教諭二年以病歸抵里越日而卒子六長聲鏞廩生次聲銓附生三聲鏹四聲鋸吏員五聲釗附生六聲鐸庠生

賀國儒字書林忠厚宅心敦宗睦族每歲歉隣里貸錢穀不責償里有龔姓者老而無子以百金私付屬身後事及龔歿林爲殮塋超拔仍憇龔族人告以前情將餘金佃田與其姪耕作鄉里嘆服時又有嫁妻者醵金以全其枕如修墳墓整道塗皆力行不倦故至今子孫衣冠不絕焉

賀泰綬字方來賦性渾噩胷無城府生平好善樂施晚年偕長子錫曜寄居萍邑歲歉減糶三載邑令給予匾額重修城垣獨捐三十金修無主墳塋數十塚每逢春冬雨雪給乞人斗笠每歲不下數百感恩者頌聲載道

補遺

明

陳 脩冲歲承家學業儒而大志未就父嶽麓山長
命代先大父訓科事至京拜職而選遵考意也建
茅堂於郊外別號草亭子嘉靖間督學劉公初泉
聞其行以高士旌之脩堅辭

皇清

劉師瓌字文映職員惻隱長子佐養大母節婦楊氏
力竭意誠能致歡心教訓孤姪國定貢生甚於其
子捐租倡建祠宇住侯度冲造石礮五座凡募修

橋路義渡 神廟出資不屑多金修勝塘陂助銀
百兩捐馨都社穀百碩乾隆五十四年邑侯 馮
獎以積效古今匾額與妻易氏俱八十四齡目擊
五代子五國光國選國棟國華國珍皆列上庠孫
自續遊泮人成均者十餘人

